



焦太史編輯國朝獻徵錄卷之四十八目錄

南京刑部一

尚書

施禮

薛希璉

楊寧

耿九疇

劉孜

周瑄

張瑄

鄭時

翟瑄

陳道

樊瑩

潘蕃

吳洪

劉纓

戈瑄

陳壽

趙鑑

孟鳳

方良永

周倫

顧璘

顧應祥

翁溥

馮岳

林雲同

陳其學

焦太史編輯國朝獻徵錄卷之四十八目錄終

焦太史編輯國朝獻徵錄卷之四十八

南京刑部一

尚書

資善大夫南京刑部尚書東安施公禮墓表

鄭雍言

施公諱禮字仲節其先鎮江丹徒人曾祖亨潛德弗仕祖廷宗有文武方畧元季以武功歷官至鎮江帥府萬戶侯父伯誠承大父命赴都請給告身既至適青徐兵起道梗不得歸慕東安風土淳美遂定居焉由是世為東安人公身長廣額自幼才識過人孝親

友兄鄉黨稱之名聞上官卽選爲邑庠弟子員讀書爲文不煩師資制行尤迥出輩流未幾以詩經領鄉薦洪武丁丑登進士第歷行人司副河南叅議以方正寡合罷免尋起任淮安府知府復以絀誤被謫所居岑寂行橐蕭然略無怨懟意衣食惟資僮僕耕種一貧如洗優游自得若忘羈旅者永樂三年被召回京除山東道監察御史九載陞大理寺丞尋遷少卿至署行在刑部事陞行在刑部右侍郎九載陞刑部尚書平恕之心益堅冰蘖之操愈勵蒙廉慎寬惠之褒封及於祖父母父母妻室焉公措履方正性度寬

平慎威儀寡言笑犯而不校斷獄剖決如流未有不得其理者同寅諸公每比擬於臯陶之復作又嘗聞公爲御史時有曰吾於此職不敢以訐爲直以察爲明惟就事論事識者已謂公有大臣體自是敷歷中外經事四朝始終一致於一動一靜鮮不由於禮義雍容廊廟於以崇尚名節於以保完正氣有不可一言一事蓋盡其爲人者訃音之辰上卽遣官諭祭每自痛泣天不福朕失吾臯陶也勅賜修墳墓立碑石以表異之噫生順死安一代重臣又復何愧庸書其槩於墓以示不朽云

資德大夫正治上卿南京刑部尚書麗水薛公

希璉神道碑

彭時

天順二年秋七月二十有八日南京刑部尚書薛公  
以疾終於私第之正寢訃聞 天子嗟悼遣官諭祭  
且命有司營葬公諱希璉字廷器姓薛氏括之麗水  
人高祖以來世有積德祖諱福贈刑部尚書祖妣麻  
氏贈夫人父諱道銘累贈監察御史刑部右侍郎加  
贈刑部尚書妣方氏加贈夫人公生而穎異聰敏年  
十二選補邑庠弟子員讀書一過卽知大義小心端  
慎如老成人識者以公輔期之永樂癸卯領浙江鄉

薦宣德五年登進士第尋詔歸進學後三年赴召觀  
政兵部拜貴州道監察御史負氣敢言不事訐直正  
統元年按治於河南克持風裁駸駸有時譽矣又明  
年巡京市場坊塌坊者四方百貨所聚也利博而奸  
生商賈患之京尹以爲言 上命察之不踰月而權  
豪罔利者屏息上下便之考最賜勅進文林郎五年  
廷選憲臣俾奉璽書分行天下舉備荒之政公直江  
西所至以便宜剗奸弊廣儲蓄增築陂塘以興水利  
變通有法寬猛得宜吏服而民賴之能聲益著事竣  
擢刑部右侍郎八年畿內廣平等府旱且蝗命公往

視至則黜賊吏蠲逋負弛徵輸嚴令捕蝗蝗乃息  
月大雨者三苗稿復蘇民以不流亡未幾往理鳳陽  
等處屯田宿弊一清軍民兩利十年巡撫直隸保定  
淮安等一十二府事有便不便者施罷不俟日尤急  
於宣上德達下情民用感悅十三年夏復往鳳陽賑  
饑民賴以濟是歲閩寇鄧茂七作亂師征踰年始克  
之而郡縣凋弊尤甚公受命鎮守其地撫輯人民旣  
而殘寇羅丕復起公請調兵討之晝夜籌度知賊黨  
迫脅者衆遣人抵其壘諭曰若等皆平民苟能自新  
吾當上請貫若罪不然將殄滅之無遺育乃已爾無

悔不日降者數萬計先是有逃入海者聞之亦棄兵  
自縛詣麾下待罪公悉釋之使歸田里其負固不服  
者縱兵擊之擒斬殆盡閩寇乃平以功陞刑部尚書  
景泰三年行考察政命公之山東公廉問以實罷黜  
貪鄙者二百五十餘人頃之山東旱蝗公祈禱於泰  
山雨而蝗息經營賑貸活饑民百八十餘萬口是年  
賜誥進資德大夫正治上卿贈封父母妻如其秩天  
順改元 上簡賢圖治任公以南京刑部尚書公益  
感激用法明審而存心一以仁恕刑無冤濫至是卒  
享年六十公爲人忠厚端詳氣貌溫雅事父母篤於  
孝敬居喪哀毀如禮教子弟嚴而正與朋友交和以  
誠居官謙約不以貴勢驕人御衆寬而有制用兵持  
刑不殺無辜尤諳練政務前後奏疏百餘章皆憂國  
愛民之計至於處大事決大議一言而定人莫測其  
際嗚呼公可謂有德有烈者矣是宜刻石墓道以貽  
久遠且以彰我朝任賢使能之盛

資政大夫南京刑部尚書錢塘楊公墓碑

彭時

天順戊寅十一月二十一日南京刑部尚書楊公卒於家又明年庚辰其弟宜之子挺會試來京請於予曰先伯父歷任於朝幾三十年功名事業著於中外惟是墓隧之碑宜有文以詔後世而缺焉敢以爲請倘畀一言庶幾其不朽也言旣因授予狀按狀公諱寧字彥謚姓楊氏世爲錢塘人曾祖本仁祖源俱隱德弗耀父諱昇有文學行誼卒官徽州府學教授因畱家焉公生而穎異甫三歲祖父引至膝下口授以



詩卽應口成誦八歲能通大學語孟十一而能屬文  
十八卽以春秋魁永樂丁酉京闈鄉試兩赴會試中  
乙榜不就宣德庚戌中第二甲進士第一人尋詔歸  
進學壬子赴召明年拜刑部主事讞獄明恕蔚有時  
名正統己未麓川宣慰思仁發反寇霄隣境朝廷命  
將征之簡文臣有才識者隨征公其首也師次麓川  
境賊遣人款軍門約降主將欲許之衆莫不喜公獨  
進曰不可兵未加而敵降是誘我也許之懼有後悔  
弗聽又曰必欲許之請嚴兵以備不虞又弗聽固請  
不已衆謂公迂檄令督運於金齒不旬月賊衆奄至

思  
發  
降

士卒多陷比還京將兵者率以失機被譴公獨蒙  
賞陞郎中歲辛酉大舉伐麓川總督兵部尚書王公  
驥知公料敵之審也仍以公行師入境王公指授諸  
將進取方畧以公督戰乃渡江攻上江賊砦賊矢石  
如雨公奮不顧身督戰益力士卒咸用命遂克之又  
進攻杉木籠山賊柵險拒守公曰賊狃於前勝當多  
方以誤之使不暇併力乃可圖王公用其言令諸將  
各視形便以進諸道俱奮連破七砦斬陶孟翥等餘  
賊奔潰遂乘勢擣賊巢圍之賊以死守晝夜攻戰不  
息因乘風舉火煙焰漲天賊不知所爲死鋒鏑及墮

崖溺水者不知其數師還 上親宴勞於奉天門賜  
公白金楮幣升刑部右侍郎壬戌丁母袁夫人憂甲  
子奉命參贊雲南軍務至則練兵伍督耕屯興利去  
害不以私撓而於懷撫遠人尤盡心焉先是有頭目  
恭項者常効力隨征公於是請置隴川宣撫司以恭  
項爲宣撫用旌其義民夷悅服有言騰衝險要宜城  
之以控制蠻夷者 上命公往城或謂公其地險惡  
多瘴非時冒之輒歿盍徐圖之公曰我知奉命而已  
遑卹其他卽往相地度工計費勉勵將士使效力越  
四旬有五日而畢工因建學舍選生徒令務學以變  
夷風自爲文刻石紀其事先是麓川賊首逸於緬至  
是公以城完民且效順謀所以致賊計乃簡銳師若  
將有所向者先遣使奉詞責緬緬人懼求出賊自效  
卒誅大憝函其首以獻自是朝廷無南顧之憂丙寅  
侍郎侯璉代公還朝丁卯暨戊辰春 上以清明謁  
祭三陵俱命公畱守未幾閩浙東廣草寇竊發師征  
未寧江右密邇三境懼有侵軼患朝廷命公巡撫公  
至按視郡縣當賊衝者增城垣立排柵以斷要路團  
集鄉兵訓以武藝賊有侵軼者輒擊斬之以故賊聞  
風畏避不敢犯公於是時益鎮以簡靜暇則徧歷諸

郡宣上德達下情崇獎學校詢求民瘼而弛張之遠  
近畏慕景泰初還京奏對稱旨有金織文綺羊酒之  
賜明日拜禮部尚書與毘陵胡公協心政務濟寬以  
嚴人謂得體後二年以病足艱於步履調南京刑部  
在刑部五六年斷獄一用寬恕民以不寃蒙賜誥贈  
曾祖祖父俱尚書曾祖妣祖妣俱夫人天順改元  
致仕家居踰年以疾卒春秋五十有九訃聞遣官賜  
祭營葬公天資孝友年十四適其父教授承詔預修  
永樂大典公隨侍至京旣而父疾且卒公於侍湯藥  
備棺斂無不致謹扶柩歸葬於錢塘及第進士歸母  
夫人在堂朝夕侍養謹甚會其第宜領鄉薦而公亦  
被召乃謂弟曰母之所生惟我與爾今俱出母何恃  
以爲養邪弟感其言養母以壽終乃仕公友愛其弟  
無間終始待鄉黨朋友一以信義事上以忠蒞政以  
勤臨民馭衆嚴不刻寬不緩所至有惠於人而性識  
機警才器宏偉處事務存大體衆中出言清辯有條  
聽者忘倦故識與不識無不稱道其爲人而慕仰之  
其學博覽經史尤長於春秋自少卽馳名場屋所作  
諸文有白雲稿臥雲稿藏於家

南京刑部尚書耿九疇傳

南京刑部尚書耿九疇字禹範山西平定州人父綱任河南盧氏縣教諭遂占籍焉九疇永樂甲辰進士宣德中授禮科給事中正統初陞兩淮鹽運司同知巡行諸場痛革宿弊丁母憂鹽場數千人詣闕乞畱之尋陞鹽運使戊辰以註誤逮至京師事白陞刑部右侍郎未幾有邊警命畱守京城鳳陽歲凶盜起奉勅撫安乃留英武飛熊諸衛軍耕守以杜姦宄覲覩之心招徠流民七萬餘戶兩淮鹺政自九疇去任多廢乃命兼理之復舉行焉又命巡撫江北諸郡景泰

初審錄諸郡重囚多所原宥有誣何菊家殺人者九疇驗無實釋菊人服其明代還復鎮關中華弊黜貪威望大振邊將請於臨洮諸衛添取防兵朝廷下九疇議九疇言邊城士卒不少爲將者果能嚴紀律精練習勤撫恤則人人自奮醜虜不足慮不然添兵徒冗食耳又以邊民春夏就田耕作秋冬入堡避寇言邊將所以禦寇衛民請止其移不能衛者罪之言切時弊轉右副都御史仍鎮其地有司買羊角以供燈費疏止之繼以災異詔求直言九疇上疏願延儒碩以廣聰明公賞罰以別忠邪擇守令以惠黎庶簡將帥以固邊疆優詔答之天順改元 上復位謂侍臣曰耿九疇廉正人也卽召爲都察院右都御史九疇自幸遭際首言五事 上皆嘉納之時邊情不寧將臣怠命九疇將率諸道御史劾之事泄反爲所訴下獄出爲江西右布政使尋陞四川左布政使明年召爲南京刑部尚書天順四年八月以疾卒遣官諭祭有司營葬九疇天性廉介自奉儉約敦崇古道慕趙清獻公爲人嚴毅不撓權貴敬憚雖累遭讒困而不變所守自號恒菴

資善大夫南京刑部尚書諡清惠耿公九疇墓

誌銘

彭時

公姓耿諱九疇字禹範別號恒菴其先東鹿人後徙樂平今爲盧氏人父祖以上在金元時多名德具載耿氏家乘父諱綱永樂初卒官盧氏教諭因畱家焉妣和氏初娠公時夢神人自冠山至覺而公生公幼穎敏秀發七歲公授以大學書受四日背誦終篇不一字遺父甚奇之弱冠補弟子員中永樂丁酉河南鄉試登甲辰進士第宣德中擢行在禮科給事中考最賜勅贈父如其秩封母太孺人妻高氏孺人正統初以大臣言蹇政之弊思故以人特陞公兩淮都轉

運司同知公通變有法弊革利興公私便之嘗條奏復竈戶均搭派出賑濟節榷鹽立刑官數事而均節二者爲著令及丁內艱去民攀畱不得伏闕請還公者三千人乃起復公爲運使公至循法責效政聲益彰門絕私謁雖童子亦頌其廉頃之以誑誤就逮事白廉能益彰超拜刑部右侍郎公持已平恕用法不苛屢以疑獄持同官可否比上聞多是公議時侍郎丁公鉉號精法律獨推重公曰耿公明決吾輩所不及也尋獨領部事一時刑獄號稱清平未幾中州民流渡淮者衆患且不測公奉命之鳳陽巡視撫安因

請以英武等九衛官軍畱屯田以守復招徠流冗俾  
附籍得戶七萬餘婚姻樹畜許與土著相通奸不得  
發境內晏然兩淮巉政自公去後輒廢至是公兼理  
之更張條戒曲盡事宜仍奏罷歲漕江南羨米易鹽  
法以登正課公私始復稱便尋奉命兼巡撫楊廬淮  
安滁和諸府州宣布德意令行禁止間錄重囚究心  
平反得原者二十六人代還民歌思之歲壬申賜誥  
進通議大夫贈祖父母俱刑部右侍郎祖妣妣俱淑  
人妻進封淑人是年奉命鎮守陝西至則繩違糾貪  
威望大著累疏止邊將添兵之請罷邊民拘那之制

申飭邊防具有方畧明年改都察院右副都御史仍  
鎮陝西會有災異求直言公以延訪儒碩進講經筵  
精選舉申賞罰任守令簡士卒爲弭災要務條具以  
陳且言乞加放黜以警庶位聞者嘆伏耀州民爲妖  
言守臣以及聞逮捕三百餘人公曰此本狂妄實非  
友也悉以減歿論天順元年 上復正宸極思公廉  
正可大用驛召至京特陞右都御史俾總臺綱間召  
見便殿嘉獎甚至時公之子裕任給事中言父子  
同在法從非宜乃改裕官翰林公感激圖報益力首  
進五事其一崇廉耻以勵士風其二清刑獄以召和

氣其三勸農桑以厚民生其四節糧賞以勸軍士其  
五重臺諫以振綱紀悉見嘉納適有璽書戒飭風憲  
公因激勵臺屬風紀爲之肅清斷獄無冤羣情悅服  
時武臣有怙寵撓法者公將率臺屬劾正之反被誣  
構及當廷辯同官者惴恐輒扳引冀免公獨引以自  
歸曰此實出某意也聞者多之旣而左遷江西右布  
政使命下卽行不色愠俄遷左布政使蒞四川振作  
蜀藩肅於內臺明年召拜南京刑部尚書介特自將  
不阿勢近益以直枉洗寃爲已任君子謂得大臣體  
天順四年八月廿九日以風眩疾卒年六十有五訃  
聞遣官祭葬如禮公體貌豐厚不妄言笑性孝友遇  
親忌日哀慟如初喪事其兄如父閨門如對大賓行  
已外和內剛好善嫉惡出於中誠敦崇古道視流俗  
若將浼焉論事是非不苟尤嚴於君子小人之辨坐  
是恒與人寡合居官蒞政以忠勤爲本所至有惠於  
民廉潔正直之操終始不渝所上章疏多經國大體  
詩文雅正類其爲人然不喜畱稿有耿氏家乘西秦  
奏稿藏於家



南京刑部尚書劉孜傳

實錄

南京刑部尚書劉孜字顯孜江西萬安縣人舉進士授監察御史正統己巳之變有獻南遷之議者孜時巡按遼東馳奏乞斬言者以安人心既及期當代衆議以邊務方殷孜爲將士所憚遂更畱一歲尋擢山東按察使再遷左布政使薦陞右副都御史巡撫南畿浙西財賦自周忱後代者多有紛更孜下車首訪忱善政斟酌舉行不事煩擾民甚便之未幾遷南京刑部尚書孜懲南部法令久弛一切矯之以嚴人多憚之成化四年六月卒年五十八訃聞賜葬祭如例

汝廉慎精審然執法過嚴或流於刻不喜其人偶有  
過犯因事中之甚至深文巧詆云

贈太子少保諡莊懿南京刑部尚書周公瑄

誌銘

劉 翊

成化二十年五月六日南京刑部尚書周公卒於家  
春秋七十有八訃聞 上遣官諭祭命工部營葬域  
贈太子少保諡莊懿公諱瑄字廷玉別號葵軒世爲  
山西陽曲人祖考諱溫甫考諱傑皆以公貴贈資政  
大夫都察院右都御史祖妣任氏妣張氏贈夫人公  
幼異凡兒資政公甚愛之時有譚曾二先生皆國初  
名賢亟遣從學洪熙乙巳選入郡庠爲生員宣德乙  
卯登鄉試會試中乙榜不就入太學學益進正統甲

子用吏部銓授刑部江西司主事精究法意讞獄明  
審尚書金公於羣屬中獨器重公凡大獄必以委之  
有死罪囚累訴其枉公乃微服訪之累月一日至城  
南聞村姥言其事果寃囚得釋給事中翟讓御史劉  
訓給燕山左衛鈔誣官盜取下法司公辨其誣由是  
賢聲大著丁卯奉命錄南北畿重囚所至多平反者  
已已北征部屬當扈從者率多託疾公毅然請行被  
重創而還景泰初陞署河南司郎中事有校尉受贓  
縱真盜而以宿讐寘其間欲陷之歿公力辨之校尉  
反坐公視獄有囚八百人時天暑懼有病歿者三日  
盡發遣之衆以爲有片言折獄之才時刑部闕右  
郎吏部推公代之公益盡心以洗寃澤物爲已任辛  
未陪幸太學有綵幣之賚順天河間二府民饑勅公  
往賑之二府素無畜積又連遭大水公條奏八事一  
裁省各處冗官二停徵當歲糧草三添減軍士糧草  
如舊四免追久負馬羸牛羊五暫罷供應柴炭夫役  
六皇莊湖泊之利恣民悉取七招商中納鹽糧損其  
斗數八借水次官倉之粟濟民事下戶部不能皆從  
而招商借粟之說尤以爲難 上聞詔特從公議公  
又爲之具耕牛種子以便於民時亢旱苗稿公行部

至武清懇告於上下神祇是夕大雨明日至滄州尚書馬公家居謂公曰昔有御史雨今為侍郎雨矣秋大熟戊寅陞左侍郎有二品襲衣之賜祭未命掌工部事又命掌都察院事成化乙丑今上改元命公祭告中鎮霍山及晉代潘三府先生因得過家省墓會族鄉入以為榮未還陞右都御史總督南京糧儲至則嚴告戒祛宿弊有侵盜為奸數輩悉懲以法謫戍遠邊倉場為之肅然南京守備大臣輒欲校斛以侵公公上疏劾其非六科十三道復交章論之由是守備者被切責乃已未幾上南京城守事宜八條及

京粟平價

每歲朝京多所建明戊戌南畿糴貴詔公發京庾之粟賤鬻之以平其價民食不艱畿輔乃安是歲陞南京刑部尚書公告戒諸司事非會勘者不得出五日以是無滯獄嘗值瘟疫輕罪悉縱遣之曰有事則召對歡聲載道南部起自洪武間至是傾圯公得請重修而益以私俸輪奐一新甲午以考滿乞休致上勉畱繼又上章復固畱冬以三載滿入見始得允公先世業鑿無由產迨公仕畢力公家不及私且久住金陵樂其風土遂仍歸江南寄籍江寧蓋公之歸也

請歸省見公飲食談論如舊意其福壽方殷未艾也  
經還朝後三年而公不可作矣年七十六子八人長  
卽經天順庚辰進士歷翰林檢討累陞左春坊左中  
允次綸太學生次紘成化戊戌進士南京吏科給事  
中次統次縉次紳次縉次維惟公德性寬宏氣度詳  
雅修髯長身議論英發平生所歷官皆循序而得不  
枉道以千人在國子時同堂生相鄰喪妻無所得樁  
公因家人送貲至傾橐與之爲主事時有罪人貧不  
能輸官紙將鬻幼子訣別不忍聞公以折糧絹償之  
還其子事親最孝遇時節老猶悲泣出入兩京法司  
幾四十年無毫髮傷人害物之舉至於領賑貸督京  
庾活民利國之功尤多故位登八座壽幾八袞子孫  
二十餘人策名甲科聯官清要以並承於公後則公  
之榮名始終慶澤宏遠一時豈多見哉

資政大夫南京刑部尚書觀菴張公瑄墓誌銘

童軒

公諱瑄字廷璽別號古愚晚號安拙翁再號觀菴系  
出宋忠定公後世家句容曾祖日宣元滁學教諭因  
僑寓於滁國初徙江浦遂占籍居焉祖克讓忠信孝  
友爲鄉人所重考俊民行在左軍都督府都事以言  
事謫戍保安衛後用薦至京公時甫十歲妣喪隨考  
與姊李恭人僦屋以寓行裝屢空考後授知縣德清  
日趨公務公每旦受書於李恭人考愛而器之曰吾  
祖有掩遺骸數萬者吾門昌大其在是兒乎後果以

公貴祖考俱累贈資政大夫南京刑部尚書祖妣徐  
妣鄭黃朱顧俱贈夫人初正統間公爲縣學生始業  
舉子受禮經於姊夫李公侃尋中應天府辛酉鄉試  
刊其經義於錄明年李偕公同登壬戌進士觀政戶  
部李公後官至都察院僉都御史公以師禮事之終  
身奉李恭人如其母未嘗少衰甲子授刑部四川司  
主事時司寇俞公士悅待屬甚嚴每稱公賢能以勵  
諸司戊辰以外艱去職景泰辛未服闋仍除湖廣司  
主事明年陞員外郎時太子少師兼吏部侍郎江公  
淵奉命南京等處公幹奏公才能欲與之俱適江以  
憂去不果是冬陞四川司郎中癸酉陞知府言安吉  
安民號健訟日不下數十百人公斷如流且屢辯疑  
獄痛革吏弊發奸摘伏如神吉民畏服然吉俗信鬼  
歲刻木以像神且冠裳聚衆迎送以徼福澤公禁之  
弗聽出遇諸途遂叱令棄像水中民首倡者悉寘諸  
法無何公邁重疾郡之長老皆曰神爲祟也請復者  
公執弗許病亦尋差郡民給路引者前例每引取銀  
四分謂之堂食前守悉爲已有公遵舊制祇收楮幣  
一貫仍爲公費丙子夏郡大饑公申上司不候報輒  
發廩以賑民賴存活者多郡學諸生有匱乏者輒分

公爲  
都薦  
孫公  
鼎堪  
祭酒  
時論  
傳之

儔給之若彭教羅倫曾彥輩皆爲倫魁實公所造就也僚屬廉而貧者家有婚喪皆設法助之又建閣於學以藏御書建祠於郡以祀忠節文廟府治橋梁道路皆修治完整公私一新時巡撫都御史韓雍氣焰烜赫郡邑皆望塵羅拜惟公不爲屈蓋公居官剛正嚴明吏部每考治績恒居天下第一天順庚辰遂由郡守陞廣東右布政使去吉之日老稚扳留不獲復建亭刻石以圖不朽公至廣會廣西流賊越境攻破屬邑連山公督官軍擒殺賊首莫文章等築城堡改邑治民賴以安賊徒周公轉等嘯聚於陽江縣黃江

屯歲久道路不通新興縣頑民鄧李保糾結流賊殺害居民逋負糧差者幾二十年官不敢詰公皆勦除之甲申流賊復來劫掠民被害尤甚公復會兵追殺賊乃遁去大藤峽蠻賊屢肆猖獗朝廷兩出師給綵段銀牌等以旌軍功公累受綵段一十八疋銀牌一十四面特賜公大紅織金雲鶴衣一襲銀錠寶鈔尤多又嘗躬督各屬造預備倉六十二處修理陂塘圩岍四千六百六十六處修築廣州新會等府縣城垣一十二處廣袤尋丈若干甃以磚石俱因民利而利之無一怨者戊子轉左布政使先是各該吏典各印

遺舍  
修訂  
築城



承差會同巡撫三司等官叅撥公曰此布政司事也  
專之人莫敢侵巳丑冬公滿九載當赴京軍民千餘  
奔走乞畱於是巡撫鎮守等官交章薦公學行才識  
剛方仁惠乞畱在任以慰民情詔可其奏辛酉朝廷  
錫誥命有操存端方才識通敏之褒封贈三代壬辰  
奉勅陞都察院右副都御史巡撫福建初所屬郡縣  
多無糧儲公命各建倉廩勸富民出粟以備凶荒民  
至今賴之沿海官軍先因事減支俸糧三十餘年遂  
以爲例公知其貧命依舊支給官軍感惠立石頌德  
閩安鎮出海有二港勝國時有鐵索橫截港口以禦

海寇歲久廢沒公奏命所司造鐵索三每索長百有  
餘丈兩岍維以鐵樁中以船二十隻駕之小港如大  
港之制而索差短由是海寇絕迹莫敢往來山寇林  
壽六魏懷三等攻劫鎮城歲久不獲其鎮守等官屢  
被責公至盡皆成擒福安壽寧縣等地隣江浙強賊  
羣聚阻塞道路公擒賊首葉旺葉春餘黨盡散朝廷  
降勅褒之鎮守太監盧勝暴橫公以聞遂革去鎮守  
人民稱快閩俗信陰陽拘忌有殞於家十餘載者公  
督屬責葬不數日出葬者七千餘棺甲午秋又奉勅  
巡撫河南風紀益振諸司少有不職公或知之輒惶

應何  
奏新  
情返

奏增  
廣東  
司主  
事

賑饑

懼謝罪時按察使何喬新副使陳選並有廉能聲公  
奏聞旌異後俱至大用人謂公知人河南軍糧二十  
七萬石先在元城縣交兌公以爲元城非河南所屬  
難以鈐制改置倉於彰德水次軍民稱便乙未秋公  
以例入京議事因奏時宜若安插流民責成守令修  
舉武備甄拔滯才等一十八事該部皆議而行之河  
南大饑公發廩賑濟仍於城四門及各寺觀設粥以  
給饑者出官庫衣布以給寒者無居止者查關廂窄  
屋土窯以處之活民不啻萬數戊戌改南京刑部左  
侍郎因見廣東司事繁卽添主事一員累歲繫逮罪

囚不旬月間各得其情問擬如律自是獄無冤滯壬  
寅秋以都御史侍郎通九載考滿赴京陞本部尚書  
南京御史何舜賓等坐賊罪徽州富民許通叟強奪  
人田當道爲囑公不聽咸正以法丁未春公齒七十  
有一上章懇乞謝事尋授誥命贈封三代如制公居  
家孝友慈愛每遇初度未嘗茹葷飲酒歲時祖考忌  
辰亦必齋戒祭祀諸弟妹六人姪四人婚嫁教育之  
事公皆身任之先世產業悉讓諸弟仍以俸資周之  
雖疎遠宗族亦使得所初公將生母夢神授一兒旣  
而誕公容質俊麗目光炯然孩提時性識聰敏稍長

博極經史屢以學問師範於人爲詩文才思溢出下筆立就自成一家且天性儉約於物無所嗜好惟聚書萬卷居官幾五十年自奉如寒士其視勢利蓋泊如也一日偶得疾未屬續前數日猶作送儲考功赴召序聞地震起坐作詩皆忠君愛國之語人多誦之平生所著有香泉稿二卷粉署餘閒稿一卷凝清集八卷閩汴紀巡錄十七卷奏議八卷南征錄三卷安抽類稿若干卷公生於永樂丁酉卒於弘治甲寅春秋七十有八公既卒上遣禮部致祭於家工部造墓域於江寧縣安德鄉唐家山之原

刑部尚書鄭公時傳

鄭時字宗良簡重端慤植性孝友登進士任監察御史以鯁直出令內鄉都御史王竑力薦之超補延平郡守有異政民咸頌之立去思亭以紀其勩成化丁亥父母繼歿聞喪卽刻奔赴廬墓三年有白兔馳擾之異有司欲上其事公極力追止會歲饑發廩爲粥里人貸券悉焚之歷官都御史巡撫陝西陝大饑公百方賑卹民賴全活時礦盜猖獗設策弭息而寧羌等處山谷深阻寇藉爲藪乃奏設縣治巡司職專攻守未幾寇皆遁去成化末有左道嬖倖者公上言利

國保民五事辭多切直觸時諱尋謫貴州叅政弘治  
改元 上嘉其忠蓋召爲左副都御史進兵部侍郎  
尋轉司寇三載屢疏請老詔允之命給尚書誥命以  
歸囊無餘資家仍舊產居六年以壽考終贈太子少  
保 賜葬祭至今鄉評重之

南京刑部尚書鄭時傳

實錄

南京刑部尚書鄭時字宗良直隸舒城縣人景泰五  
年進士授山西道監察御史歷延平福州二府知府  
四川左叅政按察使湖廣左布政使進都察院右副  
都御史巡撫陝西適關中大饑盜起時督屬擒其渠

魁而諭散其餘黨地方以寧成化末上疏言盡誠敬  
以格天心明禮儀以絕妖妄減進貢以蘇困窮絕傳  
奉以杜僥倖重名器以待有功五事當道有惡其過  
直者左遷貴州叅政弘治初復陞右副都御史撫治  
勛陽再巡撫湖廣召爲南京兵部左侍郎進南京刑  
部尚書以年老乞休疏三上始允弘治十二年八月  
卒年七十有七訃聞贈太子少保 賜祭葬如例時  
居官有廉慎名居親喪嘗廬墓三年有白兔馴擾之  
異云

貧政大夫南京刑部尚書贈太子少保翟公瑄

墓誌銘

李東陽

今之三法司各有職洛陽翟公歷兩京爲御史爲寺丞爲都御史以至尚書徧居而歷試前後三四十年予所及見指不能數屈可謂賢且勞矣公旣卒天子念其勞遣禮官諭祭工部營葬事特贈爲太子少保公諱瑄字廷瑞成化祭已爲浙江道監察御史巡禁城及通州倉及濟寧以南河道所至有聲按應天徽州諸府至寧國廉知有二豪虐焰甚熾有司庇之莫敢發公事竣且去忽厲聲曰吾再至倉陳兒不

虞後錄 卷之四十一  
毀倉許小官不折船罪且歿府縣皆連坐衆相顧駭  
愕於是二豪者皆屏跡後復業改行焉改山東道掌  
道事兼總諸道奏牘名益起甲辰監禮部會試綜理  
有法尋擢南京大理左寺丞評駁惟允丁未擢都察  
院右僉都御史巡撫山西兼督鴈門諸關內輯外捍  
務勤夙夜逆賊王良李鉞潛遣人出境構虜患且作  
公馳至忻州道阻賊衆卽督官兵擒之或請報捷公  
慮及無辜執不可以常奏 上降勅獎勵加俸一級  
邊儲折銀民困輸納多流徙失業公奏減太半歸者  
相屬弘治辛亥遷右副都御史入理院事陳恤刑革

弊數條

上以其深切時務多賜採納丙辰進右都

御史庚申遷刑部尚書皆在南京寬嚴中適每斷大  
獄必審覆未嘗苟決人皆以長者稱之間疾作具疏  
乞休 上若曰瑄老成練達精力未衰宜善調攝以

副委任後再具未上而卒蓋其履歷之大者如此公  
初以經學名累舉得進士爲奉化知縣數年始以政  
績被徵雖若晚達竟臻顯用公弟瑛舉進士官至南  
京太常寺卿贈及二代公獨歎其未伸本報後以都  
御史貴贈其祖考妣而下秩顧加重君子稱爲孝而  
平居承志致養友弟訓子念故舊卹孤獨凡義舉皆

其餘事也公先世居鹿邑元季始遷洛陽以醫鳴者  
九世曾祖伯常爲醫官祖壘 國朝永樂間徵至南  
都因家焉考諱觀被選爲 皇太孫伴讀後爲太醫  
院御醫供奉 內局醫不責報有德在人子銓繼舉  
進士爲大理右寺副公年六十九葬聚寶門外某鄉  
之原

南京刑部尚書陳公道神道碑 劉 健

公姓陳氏諱道字德修其先家汴之長葛靖康末有  
諱鐸者自長葛避地於杭尋入廣流寓番禺迄今爲  
名族至諱天福者洪武初遣戍泗州生榮僑居盱眙  
因占籍焉公之祖與父也公幼有大志辛苦力學伯  
兄克正爲河間縣學教諭不遠千里往師之河間畿  
內多名士因與之漸磨學業大進天順壬午領南畿  
鄉薦甲申遂第進士成化改元授吏部文選主事未  
幾坐累調南京刑部歷員外郎郎中清謹守法門無  
私謁都人因有板陳之彌刑部諸司惟廣東最稱繁

劇公爲是司獄無留滯時莊懿周公爲尚書雅重之推摠諸司章奏一時僚友有疑事成就正焉丁酉值內艱服除改南京兵部武選甫餘年擢知浙江金華府民多健訟所蔓連動數十人累月不決公至詢之不數語得其情牽連者隨皆釋之有巨豪屢起大獄官司追捕輒身負黃袱聲言上訴衆畏之如虎公召置於法卽服辜無異辭府獄故在治外人得出入狡獪之徒肆爲教誘公命限以高垣有古木當垣合抱民祠以爲神伐之而公適有小疾或以神之靈恐公公不爲動樹竟伐而公疾良愈弘治戊申陞江西右叅政剽煩治劇益盡其心嘗分守湖南道得吏民之刻害者十數人悉加重譴他郡邑聞其風咸憚之王子遷雲南右布政使踰年轉陝西左布政使所至輒有能聲乙卯進都察院右副都御史奉勅巡撫河南公具疏陳地方利害謂彰德等府與山西直隸鎔處水旱之餘民多爲盜宜專設武臣陳州境鄰直隸潁州數百里盜所出沒宜增添縣治黃河之決河南爲上源而患及直隸大名府等處濬治夫役宜屬之河南事下公卿議奏多從其言又以宗室分封河南爲繁衍而無籍之徒出入其第肆爲撥置貽患甚



大乞嚴加禁約以篤族親親尤人所難言迄今語地方事宜者賴之戊申 召爲刑部右侍郎未幾轉左庚申南京都察院掌院事缺員僉以公舉遂陞右都御史以往踰年改南京刑部尚書公以久職刑名凡獄訟之輕重悉取按牘顛末閱之詳允而後行死獄必求其生而不可得始成獄故一時囚犯鮮有稱冤者癸亥冬滿三載將考績過京值寒疾卽上疏乞休朝廷勉留之旨未至前一日竟卒弘治甲子二月十日也年六十有九訃聞 詔贈太子少保遣官諭祭命有司營葬如例公爲人沉靜寡言與人交及取與皆不苟爲政尚寬厚至於臨大事治大獄不舍晝夜思之期於當而後已嘗以書示其子曰先正所謂煦煦爲仁子子爲義皦皦沽名庸庸保祿近世士大夫急於進取者往往涉此吾平生俱不及人獨幸不在此列亦願汝曹效之觀此則公之所養可知矣子男三長大章成化甲辰進士南京太僕寺少卿

南京刑部尚書贈太子少保諡清簡樊公

狀

顧清

公諱瑩字廷璧姓樊氏系本周樊侯山甫之後世望  
南陽十四世祖諱盛宋仁宗時戶部尚書贈金紫光  
祿大夫子清歷翰林學士尚書左丞參知政事資正  
殿學士諡文懿與弟河東節度使湍從高宗渡江僑  
寓常山之壘石自是爲常山人曾祖遜國初舉明經  
授遼東都指揮使司都事始遷繡溪祖浥永樂中薦  
授清河訓導考文檢別號素軒博學多藝能隱居不  
仕以公貴封監察御史與清河俱累贈資政大夫南

却金亭

京刑部尚書祖妣江氏妣徐氏俱累贈夫人公幼敏  
悟好學未冠知自尅勵屏居山寺潛心義理蓋冬不  
爐夏不扇者凡三年景泰丙子一舉捷鄉闈天順甲  
申登進士引疾歸養久之拜行人司行人奉使西川  
餽贈皆不受土官作却金亭以表其清成化辛卯擢  
監察御史山東盜起奉璽書追捕不旬日得其渠首  
以歸清理淮陽軍所條畫事宜至今爲例己亥按雲  
南以檄諭交人中其要害交人懼而納款中貴人左  
右撓法衆爲公難之公開誠與語爲定要束有犯者  
痛繩之曰吾爲爾息言也貴人悟而自戢後卒以善

去德之終身丁素軒憂服闋知松江府松賦重役繁

自周文襄後法在人亡弊蠹百出其大者運夫耗折

稱貸積累權豪索債無虛歲而倉場書手侵盜害人

虛入詭出移新蔽陳衆皆知之而未有以處公至晝

夜講畫盡得其要領曰運之耗以衆皆齊民靡所統

一利歸狡猾害及善良而夏稅軍需糧運綱用與凡

供應織造走遞等費皆出自秋糧餘米旣收復糶展

轉迂回此弊所由生也乃請革民夫俾糧長自運而

寬其綱用以優之除常運本色外其當變易者盡徵

白銀見數支遣部運者旣關係切身無敢浪費卒事

賦法

皆有餘貲掌計者又出入有限無可蔽藏而白銀入官視輸米又率有寬剩民懼趨之於是積年之弊十去八九而田野之間無復睢突叫呶之患公方考尋文襄立法初意舉其偏弊而通融之以爲經久計如清水鄉竈丁草蕩以絕富人之兼并革收糧囤戶以潛消糧長之侵漁取布行人代糧長運而聽齋持私貨以補不足皆有寬惠及民而公事沛然以集巡撫使下其法於他州俾悉遵之以毋憂去在官不二載松民懷之至今弘治初命天下舉異才南京工部侍郎黃孔昭以公應詔稱其明慎廉潔堪任憲臺吏部

尚書王公怒聞之喜曰薦人當如是矣將驟用公庚戌起知山西之平陽明年卽以爲河南按察使特河溢境內漂流數萬家公躬詣賑卹所全活甚衆河南錢穀於北方爲浩穰巡撫徐公欲考見本末而衆難之以問公公曰視萬猶千視千猶百夫何難顧某非職耳徐公以屬公於是部吏鉤考不旬日宿蠹一清衆皆服之七月陞應天府尹京府素稱難治守備蔣琮尤怙寵作奸與言官奏訐連歲所蔓引罷黜甚衆而事終不決公承命推鞫初若不與異者琮覘知之不爲意最後及山陵龍脉事琮遂得罪去公在府屢

治大獄舉法不苛類若此是舉衆尤稱快絕類王沂公之去丁謂而公恒自以不足也應天故有常例錢數千緡以給宴勞公至悉罷歸之民及壬子鄉試乃出其在宮者助場屋費陞南京工部右侍郎尋改都察院左副都御史巡撫湖廣兼贊理軍務錦田賊與兩廣猺獞爲寇聚衆幾三萬人公謂賊如此理不可盡殺不開其生路將致死於我乃下令除首惡必擒餘悉貫不問賊聞之稍稍散去遂得其倡亂十八人置之法而牒其餘歸本貫兵不血刃一方以寧於時巡屬水旱連二十州而諸藩府繕修未息公私困弊

衡州等處且乏鹽公奏通廣鹽收其餘利以助工作給賑濟又奏停綾紗紙銀數萬兩奏減襄府琉璃瓦料以常瓦參之奏止安陸州展北城以益藩府地比省費數十萬故年雖侵而民不甚病以疾乞休致總兵官鎮遠侯顧溥上疏懇畱謂公之在任官吏畏其威軍民懷其惠疾不至甚政賴以和從之將失衆望而公請不已章三上許歸就醫藥間居七年未嘗入城府家人遵教飭無絲毫過知衢州府沈杰御史石玠張恕等交章論薦而大學士長沙李公尚書鈞陽馬公華容劉公都御史浮梁戴公輩亟稱之於朝辛

西以舊官起撫治鄖陽改南京刑部左侍郎兼都察院左僉都御史巡視雲貴時公年幾七十矣單車屏從躬訪利病雖巖阻炎瘴人迹所不到處一一履行奏劾鎮守及巡撫官罪狀黜不職文武吏千七百餘員修城池勵兵馬賑貧窮撫流散威惠大行有爲土官欲其牛數頭不還者聞公至走訴之公還其狀曰汝弟歸彼今歸汝牛矣已而果然且詣公伏罪公慰而遣之他土官聚兵讐殺且攻城有司不能制以白公公奮曰吾在賊敢爾邪不去當直擣其巢穴舉其族覆之語聞卽敘兵退其爲蠻夷所畏服如此召爲

南京刑部尚書疏決無滯犴獄幾空乙丑夏公晨興若有所發寤卽上章乞致仕五月 孝宗賓天公哀痛感切至於某月章四上乃得請有老成清慎之褒月米輿夫之賜逆瑾用事槌其問隆平侯承襲事落職爲民又以守松江日減官布以蘇民困事責輸米五百石公怡然受命然自是家益貧戊辰十一月十八日以疾卒又明年瑾誅詔書盡復公官秩而公不及見矣公爲人誠慤簡易不事邊幅於世味泊然未嘗有所好布衣蔬食僅適口體陋室敝廬僅取蔽覆鄉鄰老稚耕夫牧豎皆接以款誠至或拍肩而與之

問對蓋其質任自然如此而聰明果決遇事立斷通而有介正而不迂在言路抗顏直論聞者縮頸更二郡食俸飲水去之日一物不以自隨宦途來往四十年水行單舸陸走雙輪而已一時正人君子交口稱之而沮之者亦力公常先覺急流中輒勇退故不爲所制而卒全其高居家孝悌事素軒公意承色順未嘗有忤伯兄早世撫其孤不異已生子孫授以恒業愛而能勞農月盛暑坐竹兜使舁行田間曰非徒視稼將以勸之也故公雖處高位而子孫皆朴愿勤學無貴驕氣內教使然也爲文章若不經意而詞采秀

發體裁簡嚴遺稿數百篇皆可諷誦尤精藻鑑

人材至松首濬日月河曰吾聞此河通狀元出也明年錢福薦鄉闈後一舉遂魁天下其他後進經識拔者多知名卒三日門前地忽陷有聲如雷亦可以見其所感矣公生於宣德甲寅正月初四日及卒享年七十五公旣以忤逆瑾去官卒之後家復殘於羣盜子孫草莽博望鄉華棠里山之原己卯六月塋當就順天試始克以其事聞詔有司治葬如制賜公祭者一賜徐夫人祭一贈太子少保又以公居官守義平易正直應古諡法合清與簡以易公名於是輿論翕

然謂直已從命而不枉道以求合者於茲足以勸矣

南京刑部尚書潘公蕃傳

戚元佐

公名蕃字廷芳崇德人從父京師占籍畱守前衛領  
順天鄉薦已而成進士在成化二年三試錄所薦上  
名字皆姓鍾氏後乃奏復潘姓初授刑部主事歷員  
外郎郎中以平允聞 沁源王與州官互訐持不解  
朝命下公涖視公廉知左右揆置王狀因列其罪寘  
之歿雲南鎮守太監錢能攫金蠻部危動邊鄙由指  
揮盧安輩調納其愚以釀厲釁公往正盧安輩以法  
歸請併治錢能士論壯之已而出守安慶安慶民甚  
安之而郡人有要路者銜公改治鄖陽鄖陽初創界



接陝洛流民歸者如市公因撫以土著遂稱善郡云  
已歷叅政左右布政晉右副都御史撫四川公至蜀  
申飭軍政倖功生事者悉治之常單車行視松茂夷  
人畏服莫敢輕出歲罷假道金以千計仍戒守將月  
出行邊諸凡扞禦撫輯積五歲而 天子無西顧憂  
已轉南京兵部右侍郎無幾改南京刑部又無幾陟  
右都御史總督兩廣故嶺南隆鎮撫臣勢重自韓襄  
毅公以來而體極尊建牙吹角列戟擁從軍門沉沉  
被組練而夾甲帳者幾萬人其戈矛子弟錯統綺而  
私自衛者又干人公性雅素至則量畱給麾下使令

者幾人向相沿以千人自衛者悉遣征發其與諸將  
大吏約凡科條如舊無事更擾有以密封白事者一  
切禁罷之至其節制特嚴一號令出卽大將不敢喘  
息方面而下稍違約束必召軍正治以法不少貸故  
威宣遠徼無弗以莊見憚也黎寇符南蛇等大肆禍  
於海南衆號數萬公前宿規方畧至是親統兵逆擊  
大破之生獲首首磔於市蠻氛以息於是論功擢左  
都御史時思恩知府岑濬思州知府岑猛皆土官其  
親叔姪也爭地讐殺至是濬攻陷思州猛窮走軍門  
祈援公令人馳諭思恩曰人臣擅攻殺罪大逆不宥

能罷兵我全爾思恩不能卽殺濬也濬終不聽叛形益張公籌其所居道里遠近險易批亢乘危分六哨以進勢不能支濬遂伏誅餘者殺降殆盡豐湖十三獠寇及惠州古三仔唐大鬢等憑恃獷戾阻兵肆亂公督率部兵分爲兩翼左右掩擊斷其吭而笞其背於是織古唐渠魁而遺黨灰滅矣公在廣五年屢大戰伐前後斬賊首級僅一萬三千有奇至節縮驛傳省冗費無筭又奏裁其冗官二十七員岑氏之役疏請撫治機宜得旨上思州改設流官陞池河縣爲州割歸德州隸之南寧府尤可以控制兩江而輯蠻方

也正德改元公力陳求退不允乃召拜南刑部尚

是時逆瑾稔橫公堅求去命乘傳歸先是岑濬旣平

公議以思恩改設流官岑猛失守府治當降同知而

大司馬劉大夏計獨相左乃奏徙猛別府而思州亦

從改革公去廣岑猛復叛瑾素忿公遂用此爲罪械

公及大夏下之獄此其意將謂是甘心不難會公論

皆不平謫戍河西後瑾誅 詔還歸田歸六年優游

林野日與農人相對桑麻村徑信其所之沾沾自喜

人有規其爲子孫計者公曰爾又欲舍已而遺所不

知何人耶公歷官久未嘗起一第時有尚書歸來無

第宅之謠謠云尚書歸來無第宅稅地種花兼種公魚舉網打魚魚換酒花前醉倒老尚書公第笑亦不問誰所為也年七十九卒卒之日屬其子曰吾素不善蓄沒無餘資葬從儉陰陽拘忌吾所不信須明霽時日下窆可也其子泣而從之後嘉靖十八年御史傅鳳翔題請贈諡祭葬下禮部議禮部議如御史言而竟尼於諡二十三年 詔賜祭葬於石

門部

資德大夫正治上部南京刑部尚書贈太子少

保立齊吳公洪神道碑

費宏

公諱洪字禹疇姓吳氏居吳江之六子橋已十世矣曾祖紹宗妣湯氏陳氏祖昂父璋以公貴贈中大夫太僕寺卿祖妣陸氏妣施氏俱贈淑人公少穎拔年十二補縣學弟子員動必循禮嘗與同舍生奉詔下屬司開讀旁近富人欲招致宴飲而其詞涉倨同舍生以貧故弗校公曰此非所謂嘑爾之食耶謝不往學官有過嚴者諸生至愬於御史欲逐之公曰師與父同可叛乎卒不置名於是識者已必公為遠器矣

年二十四舉成化辛卯應天鄉試又四年登乙未進士科初授南京刑部主事歷員外郎郎中諸所聽斷都人屈服而疑獄大司寇必屬之公公恒存欽恤囚病輒損俸爲糜啖之丁未陞貴州按察司副使蓋冢宰李公裕在南臺知公故也未幾以內外艱歸癸丑服闋改廣東巡視海道海濱素稱利穴或攝醮政則亦有私其羨而商以遲留及受颶風之患者至公秋毫無犯弊革且盡越人歌之御史王公哲欲葺諸公署而費遂無從出籌之公公曰鹽司有舊引若干舊爲權豪所專不及於商今請以給商可得錢數十萬其事濟矣如其言而費遂給中官守兩廣者令四屬各以一舟聽役舟敝又令輸金已而兩徵之民益不堪御史汪公宗器將革之且欲追所得之金公曰往者不可追况未必能追乎第自今釐正勿病吾民足矣如其言而中官帖然有叔姪同行異宿其叔宿樹下爲漁人所殺投池中姪意其宿於別館也訟館人及池旁者數家械繫且歿衆莫能辨公廉得其情乃以漁人償歿盡脫諸寃者人以爲神官軍濫殺邀賞諸歿者之家以寃聞遣廷臣按驗公與焉悉心推訪盡正濫殺者之罪尤尚儒術所至進諸生試之凡經

公賞識多中高第已未陞福建按察司按察使瀕行有閩帥以犀珠走間道爲餽公謝之帥曰公去矣某無所干且人無知者何損公名公曰若意善矣然非知我者也卒不受閩俗囂訟公聽之必以其情民率悅服明年建寧延平大水民貧且互劫公輒以便宜發粟賑之汀漳軍餉缺盜賊蜂起公取征商之羨賑之而民始安土徭戍者有所索守臣集三司議焉公曰不與則致叛與之則爲例不若以貸爲名而姑與之羣僚歎服富家之主嘗乘兜他出以一奴隨中道忽棄兜與奴返步遣歸還則爲典財者所害主家訟奴及二傭之昇者於官奴曰傭見吾歸而殺吾主傭曰奴引主去而殺之耳吏莫知所坐公曰三人者同發主家顧不畏其家屬而中道殺主乎訪其里嫗知典財者有手血濺衣之迹捕其人寘於法布政司之吏有微罪鎮守中官銜其使欲公重吏罪以爲使累公厲聲曰殺人如人吾不爲也辛酉入爲太僕寺卿時方多事公正羣僕修馬政邊陲倚之乙丑進工部右侍郎督理易州山廠於薪炭羨餘及公圃邸舍之息一無所取正德丙寅遷左侍郎入視部事會有黨逆瑾怨司馬劉公大夏而誣以重罪者武宗下大

臣議公力辯之人多公勇于附善不避權倖已巳冬  
部長缺資望及公而瑾方納賂爲有力者所得公弗  
意動未幾遂有畱都司寇之命寧河王鄧愈之後有  
兄弟爭所賜田宅者詔南京三法司覈之其兄倚瑾  
爲援而求勝焉公不從遂忤瑾令公致仕公曰是吾  
志也飄然歸吳江杜門謝事惟日課子孫讀書奴婢  
耕織暇則嘯歌自樂里之後生考德問業及郡邑大  
夫從而諮政者公酬應無倦縉紳道於其境必求公  
之廬而禮焉辛未公之子山以刑部主事遭恩例進  
封公資政大夫公益自感激每貽書戒子竭忠圖報  
今 上入正大統又進公資德大夫正治上卿家居  
十五年廟堂之憂無日不往來於懷遇賀萬壽必夙  
興恐後吳中族寢盛公懼其久而漸疎如塗之人也  
作譜以明其宗嘉靖甲申得末疾繼聞仲子巖之訃  
遂不復省事溘焉而逝享年七十有八子四長卽山  
今爲浙江布政司左叅政次巖與山同登戊辰進士  
官亦如之訃聞詔禮部賜祭工部爲營葬事復贈其  
官爲太子少保賜誥命以寵嘉之

資德大夫正治上卿南京刑部尚書劉公纓行

狀

文徵明

公姓劉氏諱纓字與清號鐵柯其先清江人裔出宋  
集賢學士原父其後有諱持矩者仕元爲江西行省  
都事因徙家新淦之橋埠灘遂爲新淦人 國朝江  
西內附持矩之子雲芳尺籍徙隸蘇州衛雲芳子迪  
吉迪吉二子次日謙海讀書有行義代兄戍吳遂畱  
居吳中公之大父也父曰宗政娶張氏以正德七年  
壬戌八月五日生公於吳城鳳凰里礪砢英特資復  
穎異成化辛卯中應天鄉試戊戌中進士己亥授湖

廣武陵知縣公少多更涉習知民隱至於吏胥乾沒並緣請屬之情咸悉其故故視事之始展采錯事無不當允縣多隙地民情不知穡種又貧什器多不備公處業賑贍務盡民利由是民知力本先是有長賦者亾粟若干石郡坐以侵官帑法歿公執不從當以亾失既而獄上上官閱其牘曰此良法家也卒從所擬明年庚子母張夫人卒公即日解官持服服闋改知山東兗州之滕縣縣小而僻素多盜洊被荒歉椎埋狼藉更數政益敝不治又其俗狠而好訟公拘摭精敏刃迎節解剖析明暢而軌道要束皆中肯綮一時莫不驚服向化盜亦衰止藩臬使者咸稱其能上爲司徒許公進所知丙午召入爲河南道御史微

辭免獄

巡東城兼督視京倉不事摘抉而繩軌攸當戊申孝宗皇帝登極公多所論奏皆隨事救正達於大體是歲奉命按福建嘗閱沙縣囚有鄧釗者坐謀殺父繫獄同時麻冤張成富皆坐歿公視其所荷校皆新翻閱牘詞多支贅且事發無主名而牘尾云云類隱語曰豈據匿名書成獄耶悉索前後公牒果得匿名書於吏解蓋釗父以負貸自刎其姑之夫陳富利釗產欲奪之故爲此陷之以冤等其所親妮併及焉



名

禁通  
海番

前時有司實文致成獄其後讞者不欲更異又惡翫法故首鼠其事公既閱實即破械釋之一時稱為神明莆田民有隨母出嫁者到股療繼父疾有司以孝聞公判曰棄本姓而冒他姓義已不明虧父體以濟父仇孝則安在眾服其明識時海外諸番入貢者多挾貨貿易於閩監泊者利其賄不禁或不時得賄即忿闕成隙公謂此非來遠道且傷國體即下令絕不許通至今以為法庚戌還朝十一月滿三載考最給勅進階推恩贈封辛亥再奉命按廣東廣南並海有別渚曰灣番舶交易之地地有珠市世其

辨覽

業者十人豪民張政者先竄名番舶商海外諸國致番貨直數十萬寅結中人監舶者假以公牒得捕盜海上憑藉聲勢張甚因欲漁奪十人者之業不得悉誣十人者為盜捕置獄中七人庾死餘三人當論決公讞得其情並釋三人抵政死指揮倪鳳亦以捕盜椎剽海上伎害尤甚顧鳳陰狡多養死士自衛急之恐變乃以計擒得之竟致之法鎮守中官上言各堡俘獲幼男寄養軍士宜從宮刑給內用而實無其人比詔取之則旋買良人子腐以充數腐且三百人斃者十五所須尚千人方買之海南公聞急渡海抵

瑠崖諸屬覈實馳還則所司部五百人方艤舟德慶  
公亟下守巡官驗非俘獲卽日散遣於是其家人感  
恩咸謂曰劉公寔生汝汝後有嗣宜以劉姓姓之矣  
丑還 朝十月再滿考畱掌本道事時外戚驕蹇結  
連中官用事縱橫亂政公率同官上疏極言言侵中  
官中官故激怒 上逮繫 詔獄罪且不測卒賴  
上仁明答而不問公前後兩按大省劾罷不職官省  
吏郡縣守令而下三十有六人誅舞文者百三十餘  
人平反絞斬罪百二十三兩侍經筵統署十一道印  
事皆集丙辰滿九載陞太僕寺少卿時馬政廢弛圉  
人多肆侵漁馬耗不孳又私相盜鬻遇稜印率滌去  
舊文更入充數公立法辨審弊爲之清又探稽孳畜  
利病得二十事條列以聞從之己未考滿給 誥命  
進中憲大夫推恩加贈父母庚申拜都察院右僉都  
御史巡撫四川兼理松潘軍務蜀去京師萬里松潘  
又在荒外濱於諸夷棧道險絕氏獠出沒爲患撫鎮  
大臣多不親履其地緩急惟事調遣或控馭失所往  
徃僨敗公曰吾爲大臣出鎮萬里可自逸以委勞於  
人耶且吾奉 命督理軍務不歷其地何以知要害  
險塞得其事情乃乘竹兜度繩橋徧行諸寨廣布耳

目以求其事端蓋諸邊戍守城堡俱在夷中夷人與吾人連結無事則邀勝取功事急則買和滅跡其事在夷者什三在我者什七公爲科條禁誡事以救寧又有所謂賞番者凡官府行邊恐夷人出擾有司先事置綵幣牛酒於路以賄之謂之買路公嚴加禁戢官軍奉約束惟謹及是公行邊軍夷帖息莫敢動在蜀甫一年以子卒悲傷成疾上疏乞歸 詔予告暫還抵家越三年乙丑御史龔元上言劉某舊撫四川老成諳練協於民夷年力未衰不應間廢會四川缺撫臣吏部卽奏起之有 詔仍以僉都御史巡撫四

川兼理如故會松茂疊溪木匠兒子諸番夷嘯集醜類連兵剽劫鑿城燒棧勢甚猖獗公親駐境上相機設策會諸兵討之衝擊躡捕轉戰折北諸夷懼馨悉投兵羅拜願獻甲馬贖罪列柯空龍諸寨爭斬賊首以降凡降二十餘寨前後俘斬千餘人捷聞降詔獎勵賜白金五十兩文綺二襲橫梁麻哈三哨嘴諸河道逼諸帖諸夷每餉運輒爲邀劫而衛士通番往往起釁蒲江關堡久已頽廢列柯諸番往來結納肆爲剽掠一時邊患往往坐此公並議復之仍議各立分司設官守之自是訖公去邊境不擾正德丁卯再滿

考進階中議大夫勲贊治尹時有 詔裁革巡撫大臣凡十有一人公得 旨還朝尋奉 璽書巡撫湖廣兼贊理軍務先是公在蜀以夔峽水勢湍急歲嘗涸溢覆舟傍有小徑盜出沒其間商旅不敢行歲歉假貸湖峽大費轉輸議自夔抵荆闢爲大道公私便利至是御史王璟以聞時逆瑾方用事恨公不先聞矯 詔逮公下 詔獄公上章自理會廷臣亦交章論救得釋乃赴湖廣荆王奏蘄州守余忠諸不法論 歿 詔公會三法司勘問公爲奏辨得末減戊辰二月陞南京大理寺卿六月 召爲兵部侍郎初崇明

盜起江南諸郡繹騷時承平久兵衛耗減殘卒莫能支所在募民兵應敵號義勇軍有司上其數請如官給餉公不可曰往時王都御史借關隴民兵討洞蠻從便宜月給糧米人三斗後皆藉爲軍至今遺患於民國家軍餉豈宜輕議事遂寢明年己巳公年六十有八上疏乞恩休致有 詔不允庚午陞南京刑部尚書有豪非法殺人欲行丐免費且鉅萬顧公不可因公所知乘間言之公竟按如律公素長於法比然不爲深文巧詆遇獄有疑率屬吏再三讞必無生理然後付法至於諄謾渫惡必盡法無貸故所屬咸執

法不敢訕濫姦宄屏息辛未公年七十再上疏乞休  
不允越明年癸酉尚書滿三載三月赴部考績有  
旨令復職凡三疏皆得溫旨不允辭久之始得請仍  
月給俸米歲給輿皂以示優寵越十年壬午今上  
入正大統改元嘉靖公年八十有一會兩宮尊號  
禮成覃恩進階資德大夫正治上卿命有司具綵幣  
羊酒存問明年癸未以疾卒訃聞命有司致祭工部  
營葬事如制公爲人亢爽疎雋而閑於吏政精敏強  
幹事多迎解然其中有定識雖事出匆遽銖黍分齊  
較若畫一彼沉思審處者或不及也故其翁張變化

人莫能測而情法不悖所至威愛並立而能飾之以  
文在蜀大修學校尤敦行義飾祠祀唐西川節度使  
崔光遠散騎常侍高適經略使李德裕宋知益州張  
詠修復他名賢祠墓尤多連按閩廣皆值鄉試爲監  
臨官精擇典校尤嚴閑衡而不爲苛瑣惟詳於檢閱  
不令有遺在廣嘗閱落卷得一士以爲奇列之首選  
榜出咸謂得人卽今翰林侍讀湛若水也侍郎海陵  
諸公瓘稱公經世之務謀國之慮往往在刑章訟謀  
外其爲尹如侯覽爲御史如唐介其撫吳蜀文教如  
文翁水利如李冰鎮靜如張詠一時以爲實錄云公

長身玉立鬚眉疎秀而舉止軒揭辭吐琅然見者竦  
企晚歲家居益事嚴整客至未嘗不見雖盛暑未嘗  
不冠吉凶慶弔未嘗不行四方書疏手自裁答尤篤  
於故舊或在患難必極力拯之雖犯謗不恤至人有  
過則多面折之雖貴顯無所諱以故人亦有讒之者  
然卒不能沒其善也素性朴儉既鬲貴非祭祀賓客  
食不重味尤寡嗜慾故晚歲神觀不衰對客舉舊事  
如引繩貫珠纚纚不能休年八十餘篝燈作蠅頭字  
精楷不異壯歲屬纊之前一日猶對客談洽無所苦  
抵暮與家人燕語如常明日覺體中不佳夜半起坐  
呼水盥頤及旦奄然而逝寔三月十有六日也年八  
十有二

資德大夫正治上卿南京刑部尚書贈太子少

保戈公瑄墓誌銘

石 珩

嘉靖元年三月十八日致仕南京刑部尚書戈公卒  
卜聞詔贈太子少保賜諭祭二壇令有司營葬事子  
鐸等以嘉靖二年十二月二十五日葬於御河西古  
堤之先塋乃奉太宰東光廖公狀請予銘其墓按狀  
公諱瑄字良玉其先浙江嘉興人曾祖諱惟善永樂  
中坐事遷河間之景州家焉祖諱立考諱寧皆以公  
貴贈資善大夫南京刑部尚書祖母倪氏母朱氏皆  
贈夫人公生而警敏端重性不嬉狎年十五入州學

文譽薦起成化辛卯舉於鄉乙未登進士授河南嵩  
縣知縣先賦稅逋脫又礦徒不時發公謂此不可以  
急治也乃寬徭役廣措置專務以德化民視歲之豐  
凶爲補徵之多寡積數年逋盡償民不懼於罔政暇  
輒躬巡近礦民居諭以禍福使得自新礦患亦息邑  
人歌思之辛丑詔爲廣東道御史督通州倉剔挾宿  
弊癸卯以父喪去位服闋復除廣東道御史會萬妃  
舞寵公率同官上章論之 憲廟震怒撻之午門或  
尤其戇公曰進言受責何辱之有復上疏獨論不報  
丙午巡按南畿弘治己酉命刷南京文卷所至著有

風裁以繼母喪守制癸丑復任推掌三法司事

陞四川按察司兵備副使撫治重夔保順等府地故  
多盜負山出沒公至明約束布威信雖偏鄉僻邑必  
躬臨撫綏召父老諄諄諭之俗爲丕變又奏請於湖  
陝相出入之地若利州施州等宜統於一庶可責成

上從其言令易勅行事蜀人乃安壬戌陞山東按  
察使剖決滯獄囹圄爲空歷城人有兄弟異居者弟  
盲人也置肆酤酒頗獲利兄嫂屢疾之弟憤恚自縊  
弟婦奔告兄嫂輒怒併酒保縛之解弟縊歿不殊以  
麩軸提之絕乃以謀殺親夫愬有司鍛鍊獄成婦及



保誣服公至鞫之云其夜有二軍主於其家宜知狀  
趣二軍對區別研審得其情兄嫂抵罪弟婦及保得  
釋人以為神乙丑陞浙江右布政使正德丙寅轉江  
西左布政使丁卯陞南京都察院右副都御史戊辰  
改都察院左副都御史時丹山屠公掌院事公佐之  
有所執論屠公輒欣然稱善嘗奉勅清查牧馬草場  
辨疆界嚴條約不為權勢所怵時劉瑾專政疾其違  
已追論浙江布政時事前後罰米七百五十石再陳  
休致不允改大理寺卿庚午陞南京刑部右侍郎辛  
未改刑部左侍郎奉勅勘岷府事賜羊酒寶鈔壬申  
陞南京右都御史掌院事甲戌陞南京刑部尚書乙  
亥三年考績上疏乞休不允賜誥命己卯於是公六  
載矣復懇乞骸骨詔慰藉賜勅給驛還鄉仍令有司  
月給米三石歲撥人夫三名以示優異公既致仕優  
游山林鄉邦宗族每欣然相過從視其言動以為楷  
式處兄弟待寡嫂撫孤姪曲盡恩禮婚喪有弗舉者  
輒助之會上兩宮尊號詔進階資德大夫正治上卿  
公疾且革呼鐸等語之曰吾起自布衣官八座壽踰  
七袞夫復何恨但君恩未報及吾曾祖墳墓在浙者  
未得沾一命有此耿耿耳言訖而逝距其生正德戊

辰年七十有五公歷事三朝四十餘年清慎之節終始一致自爲御史以至大司寇所舉刺務存大體不爲深文小苛以取時譽然聽斷羣獄是非曲直毫髮不爽期於天下無冤民利害禍福非所計也天性開直賢而能讓有勞而不伐故累經夷險卒能成其令名以壽考終可謂長厚君子哉

榮祿大夫南京刑部尚書陳公壽墓誌銘

楊一清

公以嘉靖壬午九月二十一日卒於南京寓舍訃聞上賜諭祭二壇命有司治葬事越幾年某甲子其子良輔良佐等始遵遺命奉柩歸其鄉新淦以某年某月某日葬於邑某山之原良佐遣其子士貞詣京師乞予爲墓誌銘予驚曰此吾同年知己友也謝世且久矣今始葬乎士貞乃出行狀一通故春坊中允景君暘所述予按而誌之曰公諱壽字本仁號蠹齋其先江西新淦人洪武間伯祖志敬坐事謫戍遼東

喪明不能往一子當代役弟志弘念其兄養無所託請代戍遂籍於遼東衛鄉人義之公之祖也父諱昌俱以公貴贈通議大夫南京都察院右副都御史公補衛學生成化乙酉舉山東鄉薦壬辰登進士甲午授戶科給事中丙午轉左給事中丁未進都給事中弘治戊申吏部薦爲大理寺丞尋調南京光祿寺少卿又擢南京鴻臚寺卿庚申被簡命爲都察院右僉都御史巡撫延綏癸亥滿九載遷南京都察院右副都御史時正德丙寅劉瑾竊柄矯詔令致仕癸酉以廷薦起改都察院右副都御史巡撫陝西未幾遷南京兵部右侍郎先是公屢上疏乞休俱荷溫旨不允疏至九上乃陞南京刑部尚書致仕有才望老成清謹素著之褒且令有司月給米二石歲給輿隸二名嘉靖改元詔進一品階榮祿大夫以羊酒綵幣存問於家時公之年八十有三矣其在戶科奉勅閱視宣大邊防劾去鎮守中官之不法者巡牧馬草場中貴有恃內庇侵尅者公請置之法時貴妃萬氏專寵後宮兄弟勢撼京師中官梁方輩結妖僧繼曉干撓國是公疏論之被逮繫詔獄尋得釋孝廟登極上封事指斥貴近無所忌避及遷大理爲忌者所指摘王

端毅公嘗疏辯之稱其正色敢言其巡撫延綏適大虜在邊羽書交至鎮城晝閉道塞不行公分布兵馬爲十路各屯駐要害使相應援多遣覘卒哨探惟謹軍勢大揚虜分兵入寇躬親甲冑爲將卒先遇賊鏖戰三十餘合擒斬八十有餘未幾火篩脫羅干諸首糺率部落精兵大至先以百餘騎誘我諸將請赴之公曰虜衆未可當也自出帳前擁左右數十騎據胡床麾指飲食如無事虜望見疑之遂引去旣而諸路將領以公方畧邀擊賊首大捷斬首若干級捷音上孝廟降勅獎勞賜賚加俸初延綏守臣以虜勢方熾鎮兵不能支請發京兵比公屢捷而王師已至總制者請破其巢未得命駐延綏久之戰馬三萬日給草束所費不貲公議出境揚兵牧馬卽採草紓急衆恐墮賊計公請以身先之保無事所省費若干萬時同事者諷公注子弟姓名戰籍中當有功賞公曰吾子弟皆不諳弓馬竟不之許識者多之先是延綏守臣失事俱得罪代巡撫者難其人太宰倪文毅公薦

公或以爲疑倪公以問予予曰是固儒將當不負公知也比予經畧西事方欲與公周旋而南臺之命下矣其在南京臺諫以言事忤逆瑾盡被執械繫京師

公與兵部尚書林公亨大上疏論救公又獨疏極言俱不報林公既得罪去未幾公亦罷歸瑾復搜剔公前任事風所司文致罰米若干石稱貸以完家素無積至是益貧不能給朝夕瑾誅言官交章薦之予在吏部會陝西巡撫缺人陝西兵荒之後兵民敝甚鎮守太監廖堂與其弟鵬姪鎧怙勢以逞椎剝無厭禍且及士夫家人人重足立予謂必得忠鯁輕去就者制之乃薦公時堂稱旨造絨氊帳幄數百間料價數十萬兩公至已完解廉知其贏餘數萬兩欲輸內權貴檄所司畱以備賑仍戒諭此後不得指進貢有所科取不然吾且執奏堂兄弟訴於所怙者欲圖中傷公遂乞歸四入疏不得請始復視事先是鎮守爪牙惡少數十輩散遣於各郡縣衛所漁獵滋甚公下令捕之皆逃歸氣焰大沮民稍安已而改南臺報至軍民數千人擁集撫臺泣畱公公曰君命也出城之日號呼之聲震地擁肩輿移日不得行陝之人至今能道之公釋褐登仕籍至退休四十年有奇大半在閒散地食祿任事蓋不甚久其建明樹立多可述而廉名爲尤著居常布素如寒士老無所於歸諸子旅寓飄泊環堵蕭然歿無以爲殮凡數歲親舊共伙助之

僅僅歸其喪官轍所至人懷去而思之在陝雖未久而得人心爲最深若其孝於親友於兄弟歸故人之喪卹其孤諸事尤立政之本狀已具悉茲可得而畧云予又聞公在諫垣論時政指陳得失無所隱惟不喜彈劾曰吾父戒我勿作刑官枉人而言官枉人尤甚顧可輕耶於戲宋王素爲諫官曰人材難得無事之時當爲朝廷愛惜程明道爲御史告於君曰使臣拾遺補過則可若搜索臣下短長以沽直名則不能公之心其類是乎銘曰不訐以爲直不矯以過正惟趙清獻之清張忠定之定有燁其光垂諸國乘有位有年有賢嗣胤以是報公孰謂天之難信也

本仁少故貧甚落落自豪嘗值上元燈節出市得遺金坐候夜分竟歸失主衆服其介從醫問賀先生學所養益遠三舉不遇乃遍歷宣大關西諸鎮欲持戈建功名積二年伏劒歸遼左理舊業乃登成化壬辰進士陞公南京都察院右副都御史正德初逆瑾竊柄矯勅令鈐束臺官不得妄言朝政開讀畢公正色論十三道曰言路其可闕乎時言官之氣恃以益壯鄭端簡公曉曰予聞之貢禹云居官而致富者爲雄傑夫漢俗近古猶若此又何責於後世之靡靡者乎

其軟默狗時以終其身者凡以利滑於心而不知戒也陳司寇立朝四十餘年於權奸歛艷無所跛倚屢起屢踣家貧不能歸流寓南都敝屋頽垣不蔽風雨卒不能爲殮具豈不爲雄傑者所姍笑耶然縉紳先生慕其風槩願爲執鞭可以媿墨夫矣

資政大夫刑部尚書贈太子太保諡康敏趙公

鑑墓誌銘

嚴嵩

今上卽位之初疇咨雋賢登於大僚維時趙公以茂德耆望簡在帝心擢南京刑部尚書尋召掌北曹公抗顏執憲棘棘無少避雖微有窒迂而勁正不回無何引疾乞休詞極懇切上重違其志詔給驛以歸有司具輿皂月廩皆逾恒品陛辭上複製古體詩十韻親灑宸翰以賜大臣謝事得賜詩近所未有蓋異數云九廟成詔進階榮祿大夫備禮存問公優游林下享年八十有四以嘉靖丁酉七月九日卒訃聞

致仕  
賜詩  
近世  
異典

贈太子太保諡康敏遣官營兆恩禮備至可謂榮名  
完節福履令終者矣公諱鑑字克正青州壽光人也  
幼從父隸籍京衛遭母喪歸免喪爲學官弟子舉山  
東鄉薦登成化丁未進士授知蕭山縣在縣廉愛有  
惠政去後民思祠之擢監察御史歷視馬政鹽法奉  
命按宣大時虜酋火篩犯境朝命平江伯陳銳等帥  
兵討之師久不進公疏劾之又陳方略甚悉於是兵  
將奮勇連戰皆捷虜爲遯去公爲御史久數推京寺  
要職值逆瑾用事出公知安慶府旋改順德府瑾誅  
乃擢浙江叅政陝西右布政進右副都御史巡撫甘  
肅歲大侵公疏請出內帑賑之及貸富人貨緡易粟  
隨所在給以粥食全活甚衆又令官給牛種勸之使  
耕次年遂大穰又浚渠招屯募民益兵邊務大修又  
却土蕃復哈密奪地璽書嘉勞改視南京院事復命  
理閩浙鹽法入視院事轉大理卿公於法比素精覈  
而宅心平恕爲刑書會治諸巨獄種種按伏咸得其  
情逆濠之變宗室坐繫者衆公疏止坐元惡請釋其  
株逮者以故獲全者二百餘人一日待漏直廬朝士  
有恃寵至入託之私者公叱之曰此豈汝寄請地耶  
聲色

聞者壯之公素性好士樂善雖面折不能



容人之過而怒過弗藏故人弗怨之臨事決議能以  
二三語折衷靡不服學士石熊峯稱之曰清梗忠實  
時以爲實紀云祖諱鐸考諱福累贈如公官妣李氏  
贈夫人元配劉氏繼許氏贈封皆夫人子岳以蔭歷  
官都勻知府次岳國子生

資善大夫南京刑部尚書梧岡孟公鳳墓誌銘

劉玉

嘉靖五年三月初四日南京刑部尚書孟公卒於位  
其屬以聞朝廷遣官祭葬公諱鳳字瑞周別號梧岡  
其先孟氏寓維揚曾祖諱彥實始來曲阜附籍臧姓  
者遂從其姓至公而後改從其宗祖諱貞考諱紀由  
舉人任華亭訓導初以伯子貴贈主事進員外郎妣  
李氏贈安人進宜人後又以公貴祖父俱贈右副都  
御史祖妣楊氏洎李宜人俱贈淑人公之生也與伯  
兄同衽宵夢吉祥預名之曰金梁玉柱彌月而降凝

重開悟識者奇之伯兄諱麟登甲辰進士累官右布政使公少與兄同學日授數千言學殖益弘弘治己酉發解山東庚戌登進士第時朝廷重守令壬子選知嵯縣嵯浙東巨邑齒繁而賦殷公勸農桑興學校使之利安又礮石甃堤百八十丈以障水衝民甚便之於是材譽益彰撫巡交薦戊午徵拜福建道御史丁內艱辛酉服闋改浙江道嘗督馬政監抽分巡視南城查點下場馬匹事不憚勞翕然修舉壬戌巡按宣大時北鄙多警公肅憲度以振戎備虜聞之不敢侵軼甲子巡按江西值寧藩潛畜異謀公一處以正折其機牙比及代不能少逞在道七年疏屢上未嘗示人問之答曰揚人之過以爲己名予弗忍也丁卯陞懷慶府知府卽其治邑者推廣之挈綱維布條約倡僚屬以興教化均徭干賦扶善抑奸開惠通河漑民田二千餘頃暇則進諸生語以爲學讀書作文之要得人滋多辛未陞山西左叅政懷慶士民懷其德政爲之立祠巡撫鄧公奏欲畱公壬申改河南左叅政督理糧儲屬流寇猖獗提督彭公率官軍追剿引公自輔公雖司犒賞稽餽饗而匡贊定多寇尋殄滅癸酉督運至京輸納以速而餘羨有歸公私稱便陞

河南按察使又卽其持憲之素而作新之風興蒞事書所行者於壁而日稽銷之吏屬警畏刑獄爲之一清甲戌陞山西右布政使屬天官奏舉方岳行旌異之典公首與焉尋轉河南左布政使務持大體畧細苛旬宣之政旣舉而案牘出納纖悉必明丙子陞都察院左副都御史丁丑調巡撫順天等府地方公督郡邑嚴察舉飭兵戎罷庸懦畿徼以寧後以攘敵切屢有錦襲寶楮之賜戊寅改提督漕運公以漕政久弛悉心經畫選能以任功剔蠹以祛害國賦以充庚辰兼巡撫鳳陽等府地方威信素著禁令益行策以河濫徐邳田廬湮沒 聖駕南巡之後儲峙一空公乃奏免常租裁縮冗費民之歿徙者稍用甦息又建徐節孝陸丞相祠延學者讀書其中以作人材以厚風化三載考績有勲封推蔭之榮辛巳陞刑部右侍郎適今 上入承大統旁求峻望以靖邊郵命公以本官兼左僉都御史提督宣大三關等處軍務公恐邊儲馬匹不足以濟具疏陳請 上嘉納之給以內帑公至選將領作士氣明賞罰謹烽堠虜懼弗復入間一入焉雨雹交作挫衄而去公曰此天威也有希功者執遊僧乞丐數十人以爲奸細公力辨於朝竟

得全活祭未六載考績進階尋轉左侍郎甲申陞南  
京刑部尚書公精白一心以伸邦禁不徇於情不挽  
於勢始或議之終乃貼然以服公入官三十七年歷  
事三朝清慎勤固無一息之違而忠孝大節尤所致  
謹少奉父訓以克有成仕而有祿恒以不及養爲慊  
入道時迎李淑人京邸日致其歡疾則湯藥必親沒  
則喪祭以禮 康陵賓天哀毀如考妣然皆出於天  
性非有強勉處上敬而不阿處下嚴而不刻子姪姻  
媾未嘗少假以私宗族鄉黨咸有恩意蓋公之學知  
求於內故於寢門大書戒慎恐懼四字俾出入觀省  
則公之修諸身達於宦業者槩可知矣年七十有一

南京刑部尚書諡簡肅方公良永墓誌銘

彭澤

按狀公姓方氏諱良永字壽卿別號松厓其先河南固始人有祖紘者在漢避莽賊之亂徙居江左有諱殷符者在唐平巢賊之亂官至銀青光祿大夫國子祭酒御史中丞其子廷範贈金紫光祿大夫因仕閩徙居莆田廷範六子並貴稱六桂公則禮部郎中仁載後也歷宋元至今十有一世居莆之烏石山下爲福望姓高祖諱大亨曾祖諱孟章祖諱象輝考諱澧字朝深以字行號質菴妣陳氏皆以弟同年進士廣

東左布政使良節及公貴游被誥勅封贈至通議大夫都察院右副都御史妣皆太淑人天順辛巳九月十五日生公於莆幼有異稟能言卽異常兒質菴公奇而愛之提學憲副任公彥常錄補邑庠生領弘治巳酉鄉薦庚戌與布政公同登進士公觀政戶部承委督通兩廣所司餽遺悉峻却之時忠宣劉公爲方伯知而器之事竣與同郡孝廉陳先生聯舟而北夜泊蘄家莊寇猝至衆怖失常公意氣安閒如平時孝廉服公之量遂定交焉是冬授刑部廣東司主事訊詞詳明斷決平恕事干權貴略不撓屈大爲司寇惠

安彭公恭敏白公所知三載考績進階承德郎轉本部廣東司員外郎庚申擢廣東按察司僉事御史知公名檄攝學政未數月瓊州賊符南蛇作亂衆至四萬攻劫殺掠守吏多棄城走公慨然請行忠宣公時總督兩廣軍務遂委公攝海南兵備旣至宣布恩信欲招降之賊未卽聽命遂調防海兵捕之授以方略前後俘馘千餘人賊勢大挫時有與公異議者貪功輕進我軍挫衄三府乃濟師分道并入公所統紀律嚴甚廣右狼兵所過搔擾獨畏公不敢犯居民按堵運奇制勝遂縛元兇及其餘黨悉平之計擒斬二千

七百有奇所獲生口牛馬器械稱是公於是役出入軍旅中三易寒暑陳淑人念公成疾卒於官所弱稚呱呱公不暇顧念卒夷大憝福及生人瓊人五祠祀焉御史有忌公者欲分以失利罪忠宣公時入爲司馬嘆曰海南之功當以方僉事爲第一顧坐以罪邪爲白於上賜紵絲表裏犒之其年海北道兵備缺吏部以公有風力又推補之公歷二道每行部所至一切行李皆令官屬籍記比還令啟篋視之以絕黠汗瓊州富民海姓者盜嫂事覺獄久不決知公嚴不可近謀遣人賂子姪爲先容公知狀立決之海康有知縣王借勢巨璫靈用其下既敗猶冒將才自薦公切之指揮張坐贓當得罪行賄自營公立寘之法由是吏民惴惴奉法巨賊皆望風解散惟黃李等慮罪不服公討平之境內肅然巡按御史華公璉首薦於朝會丁質菴公憂卽日奔歸斥去常例水手銀與僚屬賄贈一無所受戊辰服除赴京時逆瑾用事外官至朝見畢必造私第至匍伏拜跪覬悅其意公入朝爲鴻臚官導詣左順門叩頭畢卽令向東揖瑾公徑趨出瑾已銜之至旅寓或勸公循例謁瑾公厲聲曰官可棄身可殺此膝不可屈竟不往瑾益怒及吏部擬

除公河南信陽等處兵備撫民僉事奉旨此缺不係  
額設方良永這廝如何營謀補選着致仕去公自分  
忤瑾禍且叵測以得致仕爲望外謝恩卽行然是缺  
實祖宗額設 孝廟申詔必推補有風力者瑾之矯  
誣類此公旣去瑾怒未已會海南有愬人命事者瑾  
欲因此中公遂奏遣錦衣衛千戶刑部郎中各一員  
往勘公恐驚動太淑人乃寓浙俟逮旅次已而周郎  
中時敏力明無罪公乃歸杜門不出絕口時事久之  
公同年黨瑾者語所知以瑾且悔促公一來公焚書  
不報庚午瑾誅乃起爲湖廣按察司副使值藍鄔諸

賊寇蜀數省動兵時大司寇雙峰洪公爲總制見素  
林公爲巡撫促赴軍門謀議居蜀數月藍鄔平入贊  
畫居多回署司事首禁官衙私買按馬頭朱璧等牟  
利害民之罪宿弊頓蠲時河南劇賊趙鏐敗走湖湘  
間削髮自匿公以計擒之管家套所遣軍人例授正  
千戶 上賜白金犒之癸酉擢廣西按察使在職半  
年理究滯繩貪墨摧豪右風裁凜然有朱御史者挾  
勢多爲不法獨心憚公假以殊禮且密令同官示以  
厚公意公竟發其奸御史坐奪官去冬進山東右布  
政使是年公弟亦自叅政陞是官閩人兄弟同登進



士又同掌方岳者自公昆弟始甲戌當歲考察吏部請依正統間例廷旌才行兼優政蹟顯著者上允之通十有六人公與列奉旨以彩幣羊酒犒之尋轉浙江左布政使入境首問民疾苦去奸吏數人出庫貯羨餘代民常供抑織造內臣之橫所省不貲幸臣錢寧冒姓朱遣僕鬻鈔于浙索銀三萬餘兩同列受其託者與鎮守太監謀欲抑取於民公力諍之不得乃上疏乞致仕不允而寧趣價益急公乃極疏寧罪其畧曰民者邦之本財者民之心國家財賦盡出東南而浙居其半故愛國必愛民愛民必惜財而浙之民尤當愛惜也寧出自賤氓甘爲廝養一旦假以義之寵躋諸公侯之列勢傾中外富擬封君其親之也至矣爲寧者粉身碎骨以圖報稱尚不能萬分一乃忍攫取民財戕賊邦本以速不臣之罪有司追價急於星火或緣爲奸倍而又倍椎膚剝髓民不堪命相與赴愬於監司監司欲言而未果民庶吞聲而不言今四方羣盜甫息瘡痍未濯邊塞多虞餽餉不斷浙東西諸郡自冬徂春雨雹爲災蠶麥不利待哺之民嗷嗷千里此何時也臣於此苟隱忍不言則已斂之財必入寧手而民心傷矣心傷則本傷本傷則枝幹

凋瘁根柢蹶拔 陛下其能晏然於上乎寧受異恩  
不思報效反取邦本而動搖之略不顧惜此臣之所  
未喻也合無下之詔獄明正典刑爲臣子悖逆之戒  
仍乞急勅巡按御史會同鎮守三司將已斂鈔價盡  
給還民未斂之數隨即停止并查究奸吏影射多科  
侵尅之弊悉寘諸法則民怨未甚猶可慰解邦本未  
搖猶可培植臣歿且不朽疏至通政司私以示寧寧  
懼留疏不下謀遣校尉三人來浙緝捕假勢鬻鈔者  
而自飾於上前乞下令散還前價公知寧必怨恨且  
中以禍又念太淑人春秋高遂決意求去連上二疏

寧復從中徑批不允且私授意以示無憾公曰是  
牢籠我耳復拜疏辭吏部覆題乃准致仕時朝廷政  
事大小多決於寧自公卿以下多諂事之公疏至聞  
者吐舌寧疑公有私書拘齎奏者至其家啟篋搜之  
無所得其遣校尉來浙兼令偵公所爲久之無所得  
乃已公抵家大理丞黃君鞏以書來賀曰官鈔一疏  
足以落權倖之膽而束其手拔浙東西數百萬生靈  
垂歿中而生之宇宙間數百年不可無此一舉外內  
數千大小執事不可無此一人丈夫生世如朝露官  
爵如雨泡不可無此一着聞者謂知言云是時見素

孝廉二公今兵侍山齋鄭公與公先後家居皆負鄉國之望恒相與遊從惇行禮讓爲里俗先部使者及郡邑夫夫恒就公諮問時政公悉心開陳畧不及私或閱邸報見時事日非憂形於色時逆濠結寧爲奧援公策濠反必犯安慶謀據留都會門生林同知有祿除安慶公教之宜密爲備已卯濠叛果如公策以有備卒敗歸人多服公先見濠既收寧亦伏誅天下望公復起未幾今上入繼大統召用舊臣乃用言官薦擢公都察院右副都御史提督撫治鄖陽等處地方先是朱御史節沈御史灼皆奏起公及是薦者

愈衆左都御史胡公世寧復薦公自代廷議推提督操江又推兵部侍郎公以太淑人年踰八十力乞終養恐朝廷不卽允復具一疏并進詞尤切至上重違其志暫許侍養進公階通議大夫誥詞有至孝孤忠始終一致清操雅望上下交孚之褒右都御史姚公鏌復上章薦公忠節請於常格之外顯示褒獎風勵天下時白巖喬公爲太宰九峰孫公爲司徒立爲查覆曰居官素謹家無贏餘宜依廉官侍郎潘禮孝養御史陳茂烈例月賜食米以示優崇得旨方良永既居官素謹着有司月給米三石養贍各處地方致

以廉  
券賜  
明米

仕終養官員但有節行可稱的都着撫按官一體優禮公辭免不允甲申太淑人以壽終上聞遣官諭祭命有司營葬大臣未任得受恩數又以廉孝賜月米皆近所未有也丙戌服除知府楊公銓奏欲起用公至是家居又十三年矣上知公賢虛位待之尋命總理糧儲兼巡撫應天等府地方少師遽菴楊公以書賀曰江南巡撫久缺欲仗名賢以甦凋瘵新建伯陽明王公亦遺書曰任賢求舊此意久濶新命之下論者謂執事尚須一出丁亥七月勅至公乃治裝行僅二僕從抵衢疾作公連上二疏乞致仕報未下先歸莆舍太淑人墓下以俟閭里姻族分日來候皆與歡洽若訣別者幾月感瘡疾乃還浹旬病革卒於正寢實嘉靖丁亥也距生享年六十有七公在病中猶聞廷推刑侍既沒一月奏使還報二疏皆蒙溫旨勉畱又閱月而南京刑部尚書之命下公皆不及見矣公沒後家人發視歸裝則深衣冠履諸殮具皆備預戒後人多格言其達於歿生之際如此訃聞上震悼下所司議卹典與祭一壇造墳安葬禮部復因巡按聶御史豹之請議公行應諡法賜諡簡肅所作有私匡類稿若干卷

南京刑部尚書周倫傳

南京刑部尚書周倫直隸崑山人弘治己未進士初授新安知縣選爲監察御史以建言忤逆瑾罰米二百石輸邊瑾誅復原職歷陞副都御史南京工部右侍郎南京刑部尚書召入爲刑部尚書尋復改南京刑部致仕嘉靖二十一年六月卒於家賜祭葬如例贈太子少保諡康僖

南京刑部尚書顧公璘傳

京學志

公諱璘字華玉應天上元人弘治丙辰進士授廣  
縣知縣入爲南吏部驗封司主事進稽勳郎中正德  
庚午出知河南開封府祭酉謫授廣西全州知州丙  
子起知浙江台州府陞浙江左叅政嘉靖改元陞山  
西按察使以病免庚寅起爲江西按察使未行陞浙  
江布政使壬辰召爲都察院右副都御史巡撫山西  
疏乞終養忤 旨落都御史以布政使致仕丁酉再  
起爲右副都御史巡撫湖廣己亥陞刑部右侍郎改  
吏部會 顯陵肇工改工部領山陵事進工部尚書

事竣還 朝改南刑部尚書公融朗濶達精於吏理能激昂任事初蒞廣平甫弱冠耳而關決敏利擿伏若神及爲開封盜起燕薊流劫中原所在繹騷彭公澤領兵壓境上簡公自輔公練兵轉餉取具呼吸折衝戡亂謀畫居多鎮守中人廖堂恃逆瑾黨圍奪自恣公每折其萌芽瑾誅廖罷去而王宏者尤諄謾繼廖出鎮公故不爲禮有所徵需一不荅歲時展謁長揖而已用是積忤宏宏方恃錢寧爲援矯 詔逮赴錦衣獄公抗言條對一無所承寧無已遣邏卒陰探郡中無所得乃文致他比以上鑄三階徙全全僻遠

荒陋公不鄙夷其民而拊教之久之民用乂安士興於學甫三年移台州台武衛錯居俗獷而喜訐胥吏竝緣爲姦公爬疏剔抉求得其利敝所在次第興除之故事武衛諸城郡爲修築費率爲主者乾沒恒歲一築築輒壞公鈎得所侵漁悉沒入爲城費擇人經理故所隸三城特完郡瀕海貧民業鹽自食苦邏卒窘之相賊殺不止公爲弛禁俾得負販出郡下而薄其稅入往軍餉不時給貧軍多稱貸駟儉得肆侵牟公支放有期軍皆給足而姦民無所牟利矣郡南瀕江多水患有中津橋且壞公修復之因築石隄而樓

其上凡數十楹人莫喻其旨已夏潦水猝至居民得  
依樓以避所活以千計乃服公先見云公久於台悉  
浙中事宜繼起叅藩與左轄日益練達展采錯事惟  
志所欲爲若賦發科謫調補吏胥皆吏蠹蟠結前政  
所不敢問者公掛根絕蔓振剔不少縱文牒糾紛隨  
事剴裁司無畱政御史按浙者皆斂手無所事事迨  
撫湖南提封數千里撫臣尊重受計坐理而已公輶  
車徧歷州郡跋涉險阻不爲厭故事行部以藩臬守  
臣自隨公悉謝去供頓次舍才足周用民不知勞念  
荆湖沃衍而流庸惰弛科輸煩擾故所至勸農業平

繇稅民用安集而歲亦比登在鎮逾年多所建白首  
言地瘠民貧兵食不足藩祿無節後繼爲難又以湖  
湘控扼邊徼地大事繁御史按部歲一代勢不得徧  
欲添差御史分蒞湖南北以廣詢謀又言外臣多茂  
異比限以藩府戚屬不得內徙非舊制乞越例推選  
以收滯才時雖不盡行聞者以爲篤論 顯陵之作  
經費不貲公長於料簡程省弗懈視他所營率損費  
十五而功實倍之且規制宏偉民不告病晚典邦禁  
不肯骫骳徇人苟罹於辜必以法繩之而怨讟興矣  
蓋公負天下重望高視濶步遇權貴或傲然不爲意



而與山林文學行誼士乃講均敵禮孳孳獎進之惟恐不給坐是忌者側目雖晚躋大位卒困於讒以沒惜哉平居事親孝父病疽公已五十餘與同臥起吮濯扶掖肉血淋漓十指皆潰曾不肯委勞於人處羣從兄弟尤極友愛少學於李璠先生李歿妻萬氏不免饑寒公分俸資給又爲其子置產旋置旋廢而其子卒然以歿乃迎萬養於家歿爲斂葬而給其孫如子終其身不衰友人胡欽歿妻方食貧養姑公俾里中上其事請表於朝文牒往來與一切費咸自公出至於里黨族屬婚喪緩急多倚成於公其於倫誼甚篤也爲文不事險刻雄深爾雅詩尤雋永時出奇峭樂府歌辭居然漢魏風格自少已有名世志舉進士卽自免歸與陳侍講魯南王太僕欽佩及從弟憲副英玉相麗澤聲望奕然出入所雅遊若李獻吉何仲默朱升之徐昌穀皆海內名流而公頡頏其間不知其孰高孰下也所歷沅湘天台衡岳皆山水勝處雖簿書鞅掌而不忘觚翰所至領客讌遊感時懷古臨觀賦詩風流文雅照映林壑有古高賢特達之風噫不可及已所著曰國寶新編曰近言曰顧氏七記詩文曰浮湘稿曰山中集曰息園集曰憑几集曰登衡

虞翁錄 卷之四十八  
岳小紀總若干卷英王名瓌有奇節著寒松齋集竝  
行於時

資善大夫南京刑部尚書贈太子少保箬溪顧

公應祥行狀

徐中行

顧公諱應祥字惟賢號箬溪其先蘇郡長洲人也高  
祖壽一生伯通伯通生克升世居長洲澣墅鎮然皆  
隱約弗著自公考恬靜翁成化間挾扁倉術行游悅  
長興山水遂占籍焉娶烏程名家楊茂公女卽公母  
楊淑人也自克升及恬靜翁俱以公貴贈南京兵部  
右侍郎恬靜翁名景爲人修潔周慎所至焚香讀書  
卽闢室無惰容而性復愛人喜施卽診治輒起又輒  
謝不責報以故雖在布衣閭閻誦義長者公居長興

數歲揚淑人夢有龍首而麕身者降其室神指曰麟也乃產公翁奇之名曰應祥蓋成化十九年九月二十五日也及髫而嗜學絕不好弄翁愈益奇之乃躬爲傳而楊淑人相翁督課尤嚴以故其成獨蚤而瓌偉特異弘治十七年公甫弱冠就計偕明年乙丑登進士丙寅 毅皇帝卽位詔充輜軒使者纂 孝廟實錄於南畿明年戊辰事竣授江西饒州府推官饒故劇郡會守及屬邑令多乏竝攝於公衆方以少年少公及公視事迎刃而解卽老吏吐舌驚服謂弗如也亡何姚源洞寇毒螫數百里虜樂平令汪和勢甚

洶洶計無所出公據老卒御羸馬叩賊營壘賊大驚出迎公爲緩頰數語汪立脫而賊亦解去自是聲名大起辛未以臺諫徵至京師以年少不應格補錦衣衛經歷當是時錢寧爲衛尉方貴幸睢盱朝著間而公益以禮法自嚴鈎染之不得寧嘗屬公具疏草自免公故爲峻語風之寧心動感公曰顧公爲我矣屬吏部進公大理卿公力辭乃得廣東僉事得嶺東道汀漳山寇起毒螫三省中丞王公伯安討之公以奇兵挫其鋒擒鹵首雷振溫火燒等千四百餘級王公奏聞命下勘報而公故讓功他省不報亡何金瑋韓

亞颯等寇海上公既督樓船橫海覆其巢而湖廣柳  
桂寇又繼起公又移兵芟薙之前後獲寇級千餘僅  
遷俸二級半歲間三捷嶺東晏然於是公武畧遠振  
咸謂伏波再生矣已卯入賀萬壽至京而江西寧庶  
人事起乃擢公江西副使分巡南昌道公馳傳往則  
罪人已得然亂後諸務廢弛庶役不平瘡痍未起訟  
牒蝟集公乃夙夜經畫內則綜理簿領外則均平徭  
役招集流亡民始慶更生然公一意拊循不爲傳會  
希合兩臺史廉之撫他事論公吏部廉知狀竟格不  
下然坐是不調者六載丙戌始量移陝西苑馬寺卿

明年事明遂遷山東右叅政連擢按察使右布政  
爲按察時疏慎謫戍戒酷刑杜株累嚴軍政四事  
上悅其言著之令甲尋超拜都察院右副都御史巡  
撫雲南公極意經畧疏凡二十餘章其大者如更定  
永昌府騰越州鳳梧所諸衛署築尋甸等府城垣添  
設永昌等府縣師儒頒王氏鄉約申明射禮寬軍職  
襲替例宦貧不能自還及旅襯與子孫流寓者竝傳  
送之華夷無不感悅亡何以母楊淑人喪不候代奔  
還觸新禁當罷旣服除與尚書蔣公瑤劉清惠公麟  
及諸名公結社菰城峴山蓋十有五年已有終焉之

志吏部都察院數爲 上言故都御史應祥銜命萬里外乃以母喪殞越徑歸於法非宜然先朝舊臣若以一青棄之似非 朝廷教孝錄舊之誼報可乃就公家起再撫雲南諸父老嘗以壯時及事公者故思公而時又苦旱公輿與雨俱至父老愈益喜時元江悖不就逮衆方議用兵公持不可曰那鑑棄衆滅親直孤獸耳緩之則卽就縛矣會公遷南京兵部侍郎去而代者急功卒至敗沒失一布政故中外咸服公先見云明年庚戌陞刑部尚書公覽刑書輒推案嘆口律未盡而定之以例凡以平法防濫云爾如以意爲獄而當時爲是三尺安在哉乃屬郎精經術法律者吳君維嶽陸君穩更定上請永者爲例時李攀龍王世貞竝陸沉署中鮮所推與公一見其文心異之過謂中行曰海內操觚家人人能矣乃若正始之音殆在茲乎公爲尚書非久而給事中有論及公者蓋公自內入時同年分宜公持國秉凡自外入者悉歸恩政府而執禮卑卑甚於門生公自以同年者舊不爲加禮亦絕不與黨分宜公嘆之乃以其旨授給事中給事中固分宜公里人也然撫公過不得乃謂鼻癭不宜禁近調南刑部立朝僅百日耳然公未嘗少

望明年壬子引年 上復勉畱癸丑十二月以三載  
滿得請致仕爲人隆準廣顙厚重宏深魁然廊廟之  
器也然天性廉約慙直不爲安祿養交坐是忤俗蒙  
訕而中實坦蕩無他腸至經術吏事武畧竝斤斤精  
至故賢士大夫翕然推重蹶而復起竟致高位公爲  
兒時卽能以禮自防不爲利疚自筮仕至蓋棺公門  
無私言顧獨好讀書無故未嘗一日釋卷以故九流  
百家無所不窺然必博證精解務當於心而後已其  
平生最喜者九章勾股法自謂窮極造化得前代秘  
傳而延陵唐中丞順之同郡沈司封桐竝就學焉其  
著作雖不刻意求工然亦皆有矩矱社中嘗評其詩  
文似白少傅奏表似蘇文忠筆札似趙文敏而公顧  
夷然不欲以才藝自居公少嘗從陽明增城二先生  
游然公能自得師務在篤行實踐不欲空談性命曉  
曉駕說卒至畔去也余嘗驗公長者行三事往嘗江  
西三佐省試號知人得士而貴溪公實公所舉士及  
貴溪通顯至相終不言公爲錦衣時同郡施御史儒  
爲中璫構擊詔獄禍且不測御史弟及所厚欲屬公  
賂衛尉求解公怒曰施公以守正嬰禍若以賄生之  
豈施公意哉竟叱去然陰爲排解者備至施竟得出

身名俱完後以胡端敏公薦再起僉憲嶺南然不令  
施知也新安汪太宰嘗與公同官廣東督兵捕寇而  
汪無功公輒推功讓汪汪竟蒙顯擢徵入至太宰然  
公未嘗德色焉其偉度長德又若此豈可與陽舜陰  
跖襲名揚已者同日語哉公既還山杜門謝外事益  
以著述自娛春秋良日則與同邑劉清惠公暨少叅  
韋公商臣監丞李公丙重修社事巖居川觀歌詠大  
平相樂也蓋今歲乙丑九月七日以瘡卒於家距其  
生春秋八十有三公所著有人代紀惜陰錄明文集  
要唐詩類抄尚書纂言歸田詩選備查摘錄授時曆  
法測圓海鏡弧矢筭術僧窻讀易愚得藏其家

南京刑部尚書諡榮靖翁公溥行狀

孫應奎

夢山翁公諱溥字德宏生而稟受朴茂無便猥童習  
年十六補邑庠生嘉靖戊子領鄉薦明年己丑連第  
授太湖縣尹至則捐苛剔蠹嚴已惠下民大德公爲  
立祠係去思焉癸巳秋召入拜吏科給事中慨然思  
所以靖獻者值大同軍殺主將廷議方未決公抗疏  
乞正法以定國是及事寧功罪失實復疏請選風憲  
官往覈之其任事每如此乙未會試爲同考試官所  
錄多名士時吏部尚書結權黨邪大逞胸臆以要上



寵下公以予與左給事中薛宗鑑者發其奸懼微誠  
不足以悟 主上廼亟上疏攻之者凡九人而大奸  
距脫內外稱快矣時歿事者二人謫降者六人公授  
江西龍泉縣丞一無愠色丙申陞廬陵知縣及考績  
陞松江府同知皆勤慎共職辛丑陞廣東僉事札欽  
州平交趾亂甲辰陞叅議丙午陞四川副使以平白  
草蠻功受賞戊申陞叅政復以平都蠻功再受賞己  
酉陞河南按察使未任陞湖廣右布政三越月轉左  
使蓋前此公不以爲淹今此人不以爲幸歷久信孚  
公道不容已耳辛亥夏四月陞右副都御史勅令巡

撫其地未幾改撫江西至則值歲旱議賑貸明年又  
旱又上疏乞蠲租省驛傳供應凡調停節省可惠民  
者靡不究心寧府自變後弋陽郡攝行府事至構爭  
不息公疏請分管以平事權 上特俞允郡藩賴之  
癸丑入爲兵部右侍郎甲寅轉左侍郎兩爲捷音事  
陞俸二級是年秋七月考績晉階通議大夫贈祖父  
珪銓如公貴皆兵部侍郎廕子忠入監乙卯爲捷音  
事陞俸給賞如前丙辰陞尚書掌南京刑部事任踰  
月以病痰一夕卒於官訃聞 天子悼之謚榮靖賜

祭二壇 詔有司治其葬公性坦豁有度與人常親

厚少間立已鮮有作客雅好文藝每有感遇輒題咏  
積而成帙今有知白堂稿行於世

南京刑部尚書馮公岳家狀

馮岳字望之號貞所浙江慈谿縣人嘉靖丙戌科進  
士丁亥除工部都水司主事差管器皿厰裁革常例  
殆盡己丑監稅蕪湖荆實木匣十數商至卽稅不停  
時刻令商自投匣中登記於籍封貯縣庫數愈常額  
盡行傾解從前監稅者輒以墨敗近著清名者寔自  
公始庚寅陞本部營繕司員外郎辛卯丁外艱甲午  
服闋補刑部廣西司員外郎公精於法律且心存仁  
恕凡招擬出公手者尚書不復改駁乙未陞本部福  
建司郎中丙申差恤刑江右虛心詳讞多所平反丁

西爲山東濟南府知府蒞任閱獄見繫囚繁甚次第斷擬釋放囹圄爲空郡多巨盜黨與竄名府胥中蹤跡詭秘人莫之覺公廉得其實一日盡縛之遠近驚以爲神盜遂屏跡問老恤孤勸善興學俗爲之變戊戌丁內艱辛丑服闋補福建延平府治行不異東郡議減驛遞供應之煩計擒巨盜竅肩缺嘴闔郡底寧民有納金魚腹以賄吏胥者公命卒剖魚金見府中懾服兩郡尸祝至今不廢乙丑陞山東按察司副使濱行適巡按何公維栢抵延因論列忤旨被逮守巡懾分宜積威不敢爲何公地公毅然周旋其事何得

無恙聞者嘆不可及比往蒞司任巡按公以平獨持風裁藩臬諸君鮮當其意獨加公殊禮事有非公所理者亦以相屬會審錄有囚年十四時與惡少遊憚祖母過於防閑遂與惡少弑之或憐其年尚幼欲從末減公曰張忠定見嬰兒掌父尚殺之况囚年十四乎卒入之一應襲指揮招數人飲飲散偶爭於途交相拳毆一人死犯者家貧衆利得金遂誣應襲獄成已久公疑而讞之得其情罪坐犯者戊申陞河南布政司左叅政周府宗室繁衍祿不能贍且給不以時往往詣司喧譟公曰同其好惡天子所以勸親親

裁藩  
封修  
南海

也敝窳固至是耶第衙門體統不可不正遂啟周王  
 禁其妄入殫心區畫及時支給罔不悅服河決為患  
 至不可禦公親歷決所授吏成法所費不踰萬緡而  
 堤固河寧民免墊溺庚戌陞江西按察使不數日尋  
 陞本省右布政使時弋陽王修鹵簿取司中金錢不  
 已且持令牌恐脅左使屠公大山無以為計公取長  
 史司移文閱之有自備工價不煩有司等語及查各  
 藩自分封後未嘗敢擅修鹵簿公欲具疏奏聞王聞  
 之驚多方祈免省費不貲辛亥陞本省左布政使司  
 中積胥盤蠹垂白不隸名尺籍者不可勝數公一日

坐堂上悉索而決遣之先是錢糧解司必預納竈

子分例積胥別名名為打對同然後投文輸納公知

其弊每日畱叅謁官有才幹者一二員聽用俟解文

一投即命官監兌給發批廻對同之弊頃除在前錢

糧出入左使司之右司無所事事公惟總簿書庫藏

悉委之右使在司三載未嘗一入庫中壬子陞順天

府府尹到京陞見視事府中吏弊山積公殫心清理

勳戚宦寺不敢干以私癸丑陞右副都御史巡撫湖

廣地方兼贊理軍務貪墨之吏聞公威望先時解職

而去羣屬供職百廢具舉甲寅陞總督湖廣川貴軍

左右  
左右

務兵部右侍郎兼都察院右僉都御史公以鄖陽居三省之中城垣未建無以捍禦遂奏城之蜡爾山諸苗三苗遺種也屢討屢叛公撫勦並行獻俘於朝奏建容美等十四司統轄之三省救寧乙卯五月奏勦邛水苗捷有銀幣之賜九月奏勦酉陽小平茶等苗捷蒙恩蔭子入監丙辰公以沅州爲總督開府之處土城易壞奏易以石而增廓之巍然稱巨鎮矣顯陵殿工成載賜銀幣三品秩滿蔭次子入監東南倭蕩平公以調發苗兵功復荷銀幣之賜播州苗酋阿項驍勇善戰煽誘湄潭三牌諸苗爲亂侵擾旁郡三省震動公奏勦平之授總兵官石邦憲等以方畧斬首數千級阿項奔突馬蹶擒斬之諸苗悉平公親詣賊巢視諸要害建築屯堡列戍分哨爲久安計捷聞賜勅獎諭進右都御史兼兵部右侍郎仍總督三省軍務丁巳二月疏乞休致溫旨勉留四月陞南京刑部尚書祖宗舊制刑部理畿內刑獄詞訟具載會典迨後十三道多所侵越公具疏請復舊制時尚書鄭公曉在北聞之亦具疏以請諸御史心懷憤憤然無可指摘乃已公掌邦刑日親部事不敢怠緩諸司勤職刑清訟理畿輔肅然已未公

奏刑  
獄一  
歸法  
復

舊制

決意乞休或謂二品將滿當有 恩澤曷少俟公不  
 顧時趙公貞吉周公如斗輩咸力止公公曰聖恩罔  
 報臣力當休吾志決矣懇疏以請 命下遂飄然歸  
 里先是南京軍糧久不時給公深以為慮集叅贊張  
 公鼂太常卿趙公貞吉多方謀畫張公緩其事公歸  
 未踰月穉卒橫不可制而黃戶侍懼其難識者服公  
 之先見公家居焚香靜坐手不釋卷不問戶外事歲  
 時非遙祝 聖壽展省丘墓未嘗輕出有司及款門  
 不例見傲心禠身老而彌篤置田供祭捐貲助學憐  
 念故舊優恤鰥寡治廩以食餓夫建漏澤園二所給  
 棺以瘞死者此類不能殫述歸田後言官交章論薦  
 隆慶庚午趙公貞吉大拜必欲起公以輔新政公手  
 書力辭趙公竟不能強也戊寅 皇上加上 兩宮  
 徽號 詔有司具綵幣羊酒存問萬曆辛巳以壽終  
 享年八十有七篋中所遺僅一縑至假棺以殮大臣  
 清貞至此亦古今所希覲也訃聞 賜祭葬如例所  
 著文集八卷恤刑稿四卷軍門疏稿四卷軍門行稿  
 五卷藏於家

南京刑部尚書林公略傳

林雲同字汝雨嘉靖丙戌會試第四人改翰林庶吉士讀中秘書以不謁時宰授戶部主事奉命權稅

九江歲計餘金數百檄府收之竟不持一錢行轉廣東提學副使立五經書院簡列郡士講業其中轉浙江右布政入覲旌治行第一轉左使尋轉副都巡撫湖廣宗藩驕恣多齟齬悉裁以法廩廩斂避轉撫臺時嚴相子世蕃索私謝金雲同不顧會所屬知縣賄遷臺史雲同摘發其罪狀世蕃從中擠之坐聽勘回籍穆宗嗣服起南京右都御史南都積習侈靡力

以挽回爲已任刊立會約節浮費去苛禮一時不變  
給事中石星陸鳳儀以言事得罪 上震怒雲同抗  
疏論救尋上疏請老荷 溫旨勉畱陞南京工部尚  
書以歲澇奏免江南十縣蘆州田課十之五四年復  
上疏辭予致仕萬曆二年 今上新政復起南京刑  
部尚書懇疏辭不允至南按江寧知縣侵沒刑部庫  
銀事論如法越月復懇求去位奉俞旨褒嘉特賜乘  
傳歸卒贈太子少保諡端簡

南京刑部尚書行菴陳公其學誌銘

余繼登

大司寇陳公諱其學別號行菴登州蓬萊人也先爲  
寧國宣城人五世祖迪當建文時爲太子少保禮部  
尚書靖難兵起抗節不屈與其配管夫人并六子七  
孫同日歿幼子珠生甫五月乳母芮潛置溝中得免  
至八歲爲怨家所訐 文皇帝特宥其死詔戍撫寧  
尋徙登州遂爲登州人又三傳而生鼎卽公父大竹  
公也登弘治乙丑進士爲給事中以疏劾權璫繫詔  
獄嘉靖初用言者起家累官應天府尹廉介剛正所



至有聲以公貴贈都御史公生有異質搏聞強記爲制義會文切理一剷浮靡之習甲辰成進士授行人諸士或唐文修名公獨沉靜自守不事趨謁太宰許公松臯嘗語人此君大有乃父風節丁未選湖廣道監察御史糾彈不避權貴緹帥陸炳倚勢作威縱諸校乘傳驛騷道路以日至自立錢法禁民間錢不得行民爲罷市又使其私人徐某結京山侯元專擅鹽利以撓鹺政人無敢言者公數其罪亟攻之有詔下涂某獄而責炳元各對狀事雖得釋而權奸凜然敬憚之戊申巡按兩淮鹽法兩淮鹽利甲天下弊竇百

出公廉得其窾要爲四事上之悉報可公在維揚職以內無言不行職以外無事不言如增通泰之堰清過淮之稅減餘鹽之價值禁江滌之私販種種皆一時實政而總兵李某縱容羣盜則有疏奉御王某騷擾驛遞則有疏於呂梁二洪夫則疏其額設之濫於河漕二大臣則疏其遷轉之非 詔皆允之庚戌陞陝西按察司僉事鎮慶陽復陞榆林叅議虜憚公威名歛不敢縱公亦嚴爲之備五載秋防邊境無事所繕修邊堡兩鎮賴之尋陞肅州兵備副使時哈密諸夷倡亂躬擐甲胄出嘉峪關三百里直抵墩煌防其

猗獫邊關恃以無虞陞本省叅政守花馬池秋防者  
三虜人懾服尋陞山西按察使晉左僉都御史巡撫  
大同適虜酋俺荅兀慎入犯左衛公督將軍劉漢等  
親冒矢石并授方畧斬首捕虜過當虜遁去癸亥陞  
右副都御史巡撫陝西適大虜入中部洛川等處公  
督叅將孟鸞大敗之斬首百餘人先是韓藩初建歲  
祿財六萬而宗室日繁漸增至十二萬歲額不及其  
半積逋至六十萬至是奉國將軍融燿等百四十人  
至會城大譟公不爲動徐檄藩司借帑金四萬七千  
分給之又疏請畱賊罰鹽鈔年例課稅諸銀以賑其

急并列其狀得

旨悉如公議而廢融燿爲庶人

而融燿不受詔逐逮者且執平涼知府祈天叙毆之  
百姓恒擾競言諸王子反卒之不動聲色戢亂而正  
法者公之力也某年以本官總督南京糧儲公條上  
三事皆切漕務至請本拆兼收民尤稱便焉尋陞戶  
部右侍郎兵部左侍郎總督陝西軍務以考績陞右  
都御史兼兵部左侍郎總督如故虜大舉寇花馬池  
等處號二十萬公提兵禦之斬獲三百七十餘人會  
別部偏將有亾失士馬者詞連公公歸待勘事旣白  
卽以厚官總督宣大軍務逆酋丘富等入犯弘賜堡

公督趙總兵迎戰敗之斬首一百七十有八詔理京營戎政復陞南京刑部尚書以積勞三上疏乞罷政上憫其勞特予致仕公自蕃臬至制府身不離塞垣先後擒斬虜九百有奇招降二千三百餘人奮獲馬牛器械甚衆修完墩臺凡二千四百餘座繕修濠墻凡八十四里又五萬四千餘丈修築營舍凡六千餘間加一品俸廕子姪各一人賜金幣者九聲震夷虜而退歸田里絕口不言兵事門巷蕭然課耕讀之外無一切聲色之奉若初未嘗顯貴者耕入有餘則倡族人剏大忠祠以祀少保京兆兩公其又餘則市

學田以周士清風篤行望廬者式焉兩臺使者薦剡無虛歲 天子嘉之予月米特 賜詔存問萬曆二十一年正月十日以疾終於正寢得年八十有奇計聞 天子悼惜俞宗伯議賜葬致祭如例仍謚恭靖

焦太史編輯國朝獻徵錄卷之四十八終

廣雅

卷之四

九



